



擷芳集卷之五十一目錄

才媛詩

古歛訥菴汪啟淑選

宋玉音 四首

梁 瑛 十八首

王素心 八首

趙 邠 十二首

沈柔則 一首

殷 柏 六首

張小禹 一首

徐 瑤 三首

江峰青 五首

嚴 氏 五首

申元善 一首

席藥珠 四首

沈 氏 二首

姚允迪 七首

李繡春 一首

陳 立 四首

魯鳳藻 三首

曹洪珍 句



穎芳集卷之五十一

古歛訥菴汪啟淑選

宋玉音

江蘇華亭縣人宋尚木女孫張澤忻之繼室也  
著有紅餘稿

奉賢縣志宋玉音知府徵璧女孫生員張澤忻繼室也徵璧為詩家巨擘玉音濡染有素故自少卽工吟咏其斷句有最傳人口者  
三首語皆悽惋可誦著有紅餘稿

夏日卽景

月下拋書倦凭闌聽晚鐘燈前棋局罷紈扇怯搖風

寄姊

久別誰能不憶家  
斷腸羞對合歡花  
樓前柳色依然處  
幾度憑闌數晚鴉

遣懷

一簾微雨一簾風  
透入雲屏十二重  
和淚出門相送處  
斷人腸在畫橋東

村居

綠楊流水一溪寒  
畫舫輕撈出小灣  
燕子乍來如舊識  
簾前飛去又飛還

句

秋增野鶴三分瘦  
老比孤松一片苔

蕉牕詩話華亭張澤忻繼室宋氏玉音詩人宋尚木之女孫也著有紅餘稿其寄姊遣懷村居斜川句俱清新可誦

梁瑛

字梅君自號穀梁氏浙江錢塘縣人黃松石樹穀之繼室善詩尤工集古著有字字香林亞清夫人所題也壽門金農書籤

西清散記松石繼娶梁氏名瑛字梅君能詩有梅花集句百首震亨序之姊玉有才思適張情田松石與情田賦黃梅因字之也其妹適康石舟松石館揚州吳軼容家梅君寄梅花集句一帙題曰字字香附懷松石詩玉勾詞客題其集古松奇石冷黃昏一卷氤氳袖出雲字字沁心春透骨夢中和月拜香君德耀當年既嫁梁家新學孟家粧玉山頽向梅花雪十萬羞纏鶴

背黃亦以名媛希有如優曇花凡所聞見必歡  
 喜讚嘆蓋惜松石遠遊負梅花而汲汲為買山  
 錢也玉勾詞客曰夫堅抱鶴背黃  
 者蟻螂之化身也梅君其唾之哉  
 黃慎字字香跋豐溪吳砥瀾之婦汪嘗刻梅君  
 夫人集古詩之百一於歙州三原袁果堂之婦  
 李又刻其十一於揚州予將使  
 綠雲歌之為閨中慶得朋焉  
 閨秀徐德音題字字香集詩玉骨冰肌秋水神  
 天然標格比佳人琉璃視匣簪花筆組織寒香  
 絕點塵萬斛明珠字字珍鐙前不惜百迴吟何  
 須吹裂柯亭竹恍觀飛花點翠茵放鶴亭邊記  
 倚闌明河目極路漫漫可憐桃  
 李飄零後只有苔枝保歲寒

梅花用詩字韻十首

消息惟愁探得遲一年佳處早梅時及今畫史無名手

報答春光只有詩

宋張道洽 陸放翁 胡澹菴 尤延之

梅花一夜遍南枝歷徧冰霜不計時嗅得寒香只如舊

袖中日日有新詩

唐劉文房 元中 宋黃山谷

月上梅梢最上枝自橫疎影照清池此時此景真堪畫

見此爭無一句詩

元葉天民 宋雪巖 唐白玉蟾 唐白香山

欲咏無才是所悲夜窗喜對出塵姿也知餘子十分俗

不要人間俗子詩

唐韓偓 宋陸放翁 元吳草廬

莫教門外俗人知直似遺賢遯迹時欲識此花奇絕處

此花之外更無詩

宋曾南豐 元中 宋張澤民 宋孔平仲

貞心惟有老松知政是寒陰慘淡時獨凭闌干意難寫

清香和夢結成詩

唐戎昱 宋張澤民 宋孔平仲

歲寒心事欲深期寧被嚴霜勁雪欺珍重歲寒心事在

生綃畫就復題詩宋陳簡齋雪巖王逢

寄語東風莫漫吹獨搔蓬鬢繞殘枝西湖處士風流遠

自續西湖處士詩元劉秉中劉伯序陳簡齋

不御鉛華亦自奇冰霜為骨玉為姿吾生也似梅花淡

為見梅花輒入詩宋北澗元許有壬林和靖

憑欄欲去立多時開遍南枝與北枝却是梅花無世態

半供明月半供詩宋張澤民元王竹齋宋邵棠

閔華題梁梅君集古梅花詩後詩山寒袖薄倚欹

斜知是仙人萼綠華一束霜毫一丸墨天衣如衲

補梅花

玉照樓下早起

自掩屏風護曉寒飢來忍把落英餐門前流水清如鏡

花似垂頭照影看宋陸游元許有壬王庭筠元惟則

題小姑奩之畫梅

自香自色自精神照影西湖自寫真不比世間紅粉態

只將顏色媚時人元中峯宋王十朋元王竹齋皇甫訪

讀奩之寄來詩

數枝梅萼一銅瓶歲晚相看眼共青好箇通家女兄弟

詩來吟咏有餘馨元虞集蒲道源元好問宋周必大

題林亞清太夫人畫梅

絕似林逋處士家數枝清瘦少尤佳久之不動方知是  
鐵線圈成个个花元劉伯序趙昌父  
宋樓攻媿元陶宗儀

松石命題西溪梅圖

一溪流水遶門斜雪岸聞香不見花爭得共君來此住  
也勝羈旅走天涯宋鄭億翁戴石屏  
唐皮日休宋劉克莊

病中慰梅

病眼雖昏看亦真疎枝猶帶舊精神主人歲歲常為客  
松石依依當主人元中薩天錫  
宋陸放翁唐王季友

冬夜

幾首殘詩旋補成不妨冷極不妨清銀蟾亦似無聊賴

直照梅花到五更宋楊萬里劉克莊  
山谷元李雲松

懷端凝妹

月十分清更著梅團團空繞百千回階前一片澄泓水  
曾與如花並照來元吳草廬宋林和靖  
徐夔唐羅鄴

王素心

字佩蘭江蘇長洲縣人所適未詳

題畫

半塘秋色映雙峰一逕丹陵霜色濃更羨蓬萊清淺處  
仙姿偏數玉芙蓉芙蓉

獨耐寒霜透晚香幾經風雨展重陽逢人共趁秋光好

爭說稱觴森玉堂 金菊

高節凌霄拂遠空 停巖梳月映丹楓 一竿擬畫鵝溪絹

又選孫枝挺籜龍 石竹

秦碑漢篆聚函關 吏部稱觴更舞斑 只有壽萱詩萬首

吳山直得比華山 壽萱

武林門外半塘紅 一水盈盈仙氣通 每到秋來紅樹好

綺筵長進錦堂中 丹楓

勁節須知歲月深 可堪相擬歲寒心 他年驄馬兒孫事

上有靈禽送好音 翠柏

空谷傳芳春復秋 蘭茝茁茁種逾幽 清風獨愛都梁好

倍有氤氳香氣浮 秋蘭

朝來誰捧麻姑酒 須是當年萼綠華 令子文孫階下舞

繽紛香氣滿梅花 綠萼

趙邠

字周初號藕莊居士浙江仁和縣人適家上林

著有蘭閣遺詩一卷

家上林亡室趙孺人行述略孺人名邠字周初自號藕莊居士姓趙氏父諱澂州同知母蔣氏有子一曰杲國子學生女子二孺人其次也孺人生有至性五歲失怙哭踊如成人隨兄姊入家塾讀書數行俱下年十三許字余來歸一年吾母以春秋高因以家事託之孺人幼故有疾疾幾死者數矣母夫人憐之甚女紅中餽之事不甚督責之孺人性復湛然未嘗以能自炫至



是驚嘆為不可及初孺人之從師學也僅授經傳古文而未嘗及詩比來歸見余案上有唐宋諸名家集時取閱之既咏不倦遂學為詩頗有天然風致故所存才數十篇孺人識見過人遇難處事輒為余陳說利害辨析疑似議論精密過於丈夫居常寡言笑動作不苟尤勇於見義有以亟告者雖力不及必勉應之無恪色御僮僕輩軌範森嚴而矜恤之意未始不歸於厚故人遵其約束孺人體既多疾丙子產後忽患骨蒸繼以咯血遷延至戊寅二月二日竟卒春秋二十有七

田園樂二首

田園樂者余與晴初述志之作也晴初雖寄迹名場而游心物外談論之暇常慨然有隱耕之志余曰子之志則高矣然內有垂白之老而外無負郭之田未易云隱也當努力一第博祿養以盡子職然後買山歸老共挽鹿車余亦請從此逝耳晴初拍肩而笑曰能如是乎夫婦歡然

者久之余因作田園樂二首以寄情焉

溪上三間屋門前二頃田春聲亂流水樹色接遙天  
 覓句朝耕後繙經夜績邊庭無索租吏飽飯好安眠  
 鄰居三五戶小小亦成村俗儉忘貧富情親似弟昆  
 羔羊朋酒會笛鼓賽神喧此外身無事耕還晝掩門

春草四首

和風披拂到陳根斗覺青青遍古原南浦愁添春水色  
 湘臯烟雜晚山痕慣縈謝客池塘夢空伴明妃月夜魂  
 寄語天涯浪遊子楚騷千載怨王孫  
 幽芳滿眼不知名嫩綠柔香到處縈塞北牛羊千里合

江南花鳥一川平  
離披帶雨迷荒谷  
綿蔓連雲上古城  
更愛遍生窮巷內  
依依如有故人情

春來無處不芊芊  
帶露含烟態倍妍  
長傍麥畦渾莫辨  
生當柳岸訝相連  
山頭獵騎遺金彈  
陌上香輪沒翠鈿  
忽聽前村一聲笛  
牧童歸去夕陽邊

繞庭嫩綠映疎簾  
一種幽情迥出凡  
低襯落花紅點點  
偶黏蛺蝶粉纖纖  
長門砌畔遮應滿  
名士牕前蔓不芟  
有客惜君還自惜  
春來依舊濕青衫

春晚書懷

微雨初晴小院幽  
晚牕獨自捲簾鈎  
落花有露空凝淚

淡月籠雲合帶愁  
迢遞已悲千里別  
等閒又送一春休

遙思今夜長安客  
乘興醉吟何處樓

時春榜將發

春陰

細雨暗於塵濛濛  
積花蕊嬾蝶夢未醒  
黏枝飛不起

四時閨怨次晴初韻

春愁滿目踏花歸  
倦倚闌干淚濕衣  
安得將身比楊柳  
漫天作絮逐郎飛

斜日暉暉映綠楊  
蟬聲聒耳引愁長  
北牕徙倚空岑寂  
孤負松風一枕涼

落葉蕭蕭霜滿天  
征衣裁就不成眠  
秋懷別緒憑誰見

寒月窺人到枕前  
雲暗關河雪壓灘  
行人此夕渡桑乾  
憂煎似火難消却  
鴨冷燈殘不覺寒

沈柔則

字德嫻江蘇吳縣人

汪氏雙節詩

心如古井斷波瀾  
辛苦相依節竝完  
宵漏催晨機自軋  
庭陰歛午突猶寒  
一身直欲兼三美  
見白居易元  
夫人墓誌同室  
真應號二難  
生死榮哀千古事  
烏頭雙蠹浙江干

殷柏

字侶松

次韻題明妃圖

遮斷征鞍苦霧稠  
鴟絃彈出沈寥秋  
美人望遠鄉關隔  
一雁南飛過嶺頭

孫貞媛詩

兵臨萬戶絕炊烟  
隨姆偕逃命緩延  
異地淹留鄉信隔  
聲聲杜宇泣牕前

獨向塵寰懺俗緣  
梅花香冷早含妍  
春風欲動愁搖落  
腸斷紅顏沒少年

忠臣烈女總堪傳  
鐵石心腸豈變遷  
莫道飄零魂魄杳

罡風遙送大羅天

貞操自具雪霜前節傲青松秉性堅閨闈幾人能殉節  
凌寒獨讓小嬋娟

一片冰心特皎然玉壺澄澈冷光懸若無寶篆臨壇訴  
紫府誰知冊女仙

張小愚

字無考浙江紹興府人詩見潮州府志

題陳貞女墓次嫂韻

未識藁砧面阿誰肯捨生一時鸞墜影千載史垂名藕  
斷絲還結花凋色不更墓門紛弔客應使達瑤京

徐瑤

字佩玉江蘇常熟縣人適周采山著有集因貧  
未能梓行

陳祖范序周生采山與余居隣比素相識側聞  
其家雖貧極有禮法言不出柵為女師和而莊  
然未聞其能吟咏予次男澹延采山為西席時  
采山新賦悼亡形容悽慘出一編則厥配徐媛  
平日所為詩也夫翰墨非閨中急務然古之賢  
淑鮮有不通於翰墨者蘇子瞻與人書云一生  
坎坷牢落正賴魚軒賢德能委曲相順適以忘  
百憂此豈細事不爾人生豈復有佳味乎此真  
實語也閱詩而想見作者性情采山之領得佳  
味可知矣噫奈何其不永年也余生平連喪偶  
中間二三十年亦復領此佳味而  
不獲偕老故尤不能無慨於心焉  
周采山亡妻傳畧亡妻姓徐氏名瑤字佩玉祖  
隱逸父處士藍田業擅岐黃嗜詩成癖母氏平

太孺人治家嚴亡妻少敏慧長而慎靜寡言佐  
母氏操作日益以勤性好潔恭而有禮雖溽暑  
祁寒不廢修束歲庚申有漢石徐丈者為余執  
柯因委禽焉辛酉歸余秋風茅屋四壁蕭然絕  
無幾微怨色事舅姑謹撫婢寬余遠塾未歸空  
樓岑寂間咏大刀婦兼子職雖倦極無忘女紅  
也丙寅春舉天壽兒尋外姑卒孺人哀毀成疾  
急歸而謂予曰妾不起矣幸君自愛壽兒善撫  
之余曲慰淚下醫藥祈禱百計罔効執手彌留  
藍橋路斷嗚呼將余之不德不能庇其伉儷而  
致然耶高堂灑淚稚子號咷我辰安在乃至此  
耶而詩藁幸存什襲藏之使嬌兒成立得見母  
氏之手  
澤焉

### 石竹花

一簇綠森森芳時絳色深名花偏勁節號竹不虛心玩  
賞猶斟酌閒評費朗吟紛繁如碎剪唯恐雨來淋

### 漁家

七里灘頭晝掩扉臨流垂釣坐苔磯白蘋洲畔眠鷗穩  
紅蓼汀前振鷺飛萬頃蒼茫蘆荻老一潭深碧錦鱗肥  
晚來歸向蒹葭浦箬笠欹斜雪滿衣

### 芭蕉

芳心常捲月寒天綠燭無烟火未然只恐夜深彈細雨  
莫教移植繡牕前

### 江峯青

字半嵐號罨谷湖南衡州府某縣人適羅某聞  
著有集惜未之見所選數章蓋與芍坡四兄任

永柳觀察時所和芷齋嫂夫人者

戊婦

楊花如雪送君行又值秋蛩應候鳴古驛霜華悲曉角  
斷垣草色動邊城聽砧空有還鄉夢化石猶懷望遠情  
製得寒衣填篋笥可憐馬革慟西征

紀夢

添香晝永小遊仙路入蓬壺別有天洞口雲深無犬吠  
山頭鶴嬾伴松眠棊閒靜對餘花落果熟新偷異味鮮  
留得清音鸞嘯在一回吟賞一迥然

白榴花

水晶簾外影萋萋雲作肌膚雪作衣玉骨不沾凡雨露  
冰盤齊剖細珠璣輕盈莫把紅巾蹙綽約爭看白鳥飛  
須識托根銀漢畔還同歷歷碧榆歸

楊柳枝詞

遊絲香暖麴塵天陌上花飛似去年殘月曉風人未起  
棲鴉啼破一林煙

至今水調怨歌頭玉笛無聲人倚樓白傅退閒樊素老  
東風曾縮小蠻不

嚴氏

名曾杼小名縈浙江仁和縣人嚴顥亭之女善

丹青工弈棋適錢塘沈長益著有素牕遺詠

沈長益嚴孺人傳略君姓嚴名曾杼小字縈系出禹航都諫顯亭愛女也歲丁亥臘月六日酉時乃舉君先朔夜外母夢神告云素娥青女采縈來念言必得生女如君賢及是生爰命曰縈隨作詩以誌其異有蘋藻尋常事他年好自思之句因相聞予家子家即行問名禮君生而穎慧百凡不俟數習而能女紅之事裁一經目已能自出機杼詩書畧一上口輒能背記會悟嘗拈韻為小詩工弈又嘗侍外父筆研見作字及花草烟雲亦小點染間遺諸姊妹宛若外父舉止端淑自處閨閣及就室無不以禮法自持蓋備得女貞婦順之全者歲癸卯歸予事兩大人克恭且敬待妯娌接姻戚謙和而婉御臧獲有仁恩其居室也雍容中時自矜莊恒以立身行世繼武前人相勉勗性厭囂航寂常茹素虔奉大士餘閒恒藝香煮茗或鼓琴以自適曾不以珠玉玩好介其心也

臯園納涼

曉粧初罷獨凭欄無語臨池相對看瘦影自憐波影澹  
移時脈脈覺無端

每苦炎曦漸減餐素牕無意展書看閒過水榭芙蓉發  
葉下鴛鴦睡正安

澗石巉巖激水聲桐陰映綠晚風清小亭幽靜無塵雜  
我亦微耽高隱情

病中步時晉韻

飛花片片小堦添引恨遊絲故遶簷病骨驚心詩意減  
推牕同望遠峯尖

掛芳集 卷五十一  
乍晴欲雨熟梅天百轉流鶯似管絃但得愁魔和病減  
瑤琴一曲對君前

申元善

字清修江蘇上海縣人桂能之室也

楊花

似雪如花一色迷隨風飄蕩各東西只愁着地無歸處  
陌上人來踏作泥

席蘂珠

字月襟江蘇昭文縣人席寶箴中翰之孫女也  
初生之日牀前忽長靈芝數莖故小名瑞芝善

畫蘭自號佩蘭幼穎悟能詩適同邑孫源湘著  
有傍杏樓調琴草

月夜送行

恨自閨中長天涯未許從君行無萬里我意已千重燈  
穗寒金剪菱花暗玉容秋風思舊約記取月溶溶

送春日餞別

匆匆又見夕陽收君與春光雨不留鳥太無情催客去  
花如有意替人愁黃鶯閣外啼青柳紅雨樽前落素甌  
一語殷勤牢記取歸帆早挂尚湖秋

題少陵集後



劔外聞軍破洛陽歸來鬢髮已蒼蒼可憐離亂經天寶  
博得荒涼一草堂

讀北齊書

鼓角無端夜自鳴儀同雄畧過羣英馭人如馬尋常事  
一慟歸心六鎮兵

沈氏

名品輝浙江嘉興縣人翰軒沈維岳文學之女  
適秀水盛生樹屏結褵十載而卒

新秋

瑟瑟金風拂翠樓桐飄知是報新秋珠簾起處涼初至

畫閣開時色正幽蓮落紅衣鷗眼冷柳拚翠黛客心愁  
一輪明月天高朗清露沾濡火自流

哭妹

我妹俄聞忽殞身慟思離別劇傷神已分同氣團樂坐  
矧作重泉隔世人旛旒淒涼悲夜月總幃寂寞泣長春  
拈香空向靈前拜欲慰椿萱掩淚痕

姚允迪

字蘊生江蘇金山縣人觀察姚培和之次女也

適崑山戴明府鳴球著有秋琴閣詩鈔

姚念曾亡妹戴孺人傳略妹名允迪蘊生其字  
先伯父觀察公諱培和次女上有兄諱惟邁字

漢生妹生三歲而孤苦病目稍長端謹如成人  
 從女師受四子書畢即謝去習女紅年十四五  
 多病病間取架上唐人詩繙閱恍然有得甫成  
 誦安章宅句之法已了然心目不待指授也漢  
 生兄娶張進士諱梁女素嫻聲韻妹因效吟漢  
 君諱元夔乾隆辛巳進士先婚於金子女有三  
 娶妹時已選得延安定邊合因憑限迫先馳赴  
 陝而以迎養事屬妹奉姑徐太夫人任所  
 在途體察飲食寒燠必慎必恭太夫人以水土  
 不宜病旅店中妹帶不解睫不交者二十餘日  
 稍愈達署數日復病遂不起辛卯秋扶兩柩歸  
 奔馳六千里困躓萬狀道傍人有見之泣下者  
 歸擇地葬翁姑與夫及金孺人指拮盡瘁不以  
 貧乏稍殺於禮踰年漢生兄卒病中念妹在崑  
 山無倚觀察公有別業在所居東遺言迎妹暫  
 棲止以撫育子女先是妹在室時性耽禪悅日  
 誦金經一二卷喜談周易毛詩能析奧理星數  
 醫卜雜學俱一一津逮從嫂張受琴數十曲月  
 霽花明時每撫之又善鑒別古書畫玩物從歸

後常慘慘不樂一切屏棄爐香茗椀獨對終日  
 幸子向學頗用以自慰丁酉冬得疴疾已愈已  
 亥夏孤子殤朝夕飲泣病遽發增劇  
 至今年庚子正月卒年僅四十有一

元日同諸兄分韻得潔字

朝陽破雲翳朔氣變華節簾櫳鳥語新石鼎香初爇堂  
 前拜嘉慶長幼咸欣悅柏酒次第斟盤蔬隨意設風暖  
 景物佳檐梅拆晴雪過午山齋靜琴書自閒潔相將茶  
 一甌拈韻擘綵纈諸兄富文藻顧我慙薄劣興到亦長  
 吟邊計工與拙且遂今日歡歲月任更迭

苦熱

碧空高高火雲厚溽暑著人如中酒斗室渾同深甌蒸

當檐恨不栽榆柳竹牀筦簟臥不得長筵何曾暫離手  
况逢久旱禾苗乾桔槔戽水鳴前灘農家婦子汗流血  
足繭皮焦力已殫我廬正與田疇接默坐思之心惻惻  
安居尚畏炎威逼天生烝民皆食力勤者辛勞惰者逸  
願得颼風驅雨來比屋俱變清涼域

樓中卽目次大姪女韻

斷虹收宿雨野色捲簾浮風起孤村暮烟深遠樹秋山  
光明日脚帆影破潮頭想得憑闌處吟情一倍幽

春雨

織烟凝霧一絲絲灑遍東風綠野滋弱柳縈愁低翠黛

落花無力濕燕支涼生深院燕歸早潤逼熏籠香散遲  
苔色滿堦簾不捲午餘銷倦獨吟詩

納涼

流憩竹林中翠影濃於幃幽禽不見人飛過低枝上

雨後

飛雨颯然至一峯天外青荷花香不已涼透水心亭

夜來香

一架延緣引蔓長淡烟微靄弄新涼夜深欲摘渾難辨  
葉底風來忽有香

李繡春

詩見谷音傳響

次韻題明妃圖

和親偏是漢家稠一畫長辭鳳闕秋寄語明妃休怨艾  
上方已斬嬖人頭

陳立

字止君江蘇上元縣人著有合簫樓集

曉起

積慮一宵事展轉不成眠開軒出戶庭踏葉到林泉時  
當白露後昂畢正中天霧氣四野開東方紅霞鮮山嵐  
橫曙色秋水澄涓涓羣鳥散高樹一鴈橫雲邊我有八

口累困厄逢餓年守道懷幽憂逍遙思神僊蓬瀛路渺  
茫浮生朝暮緣朝暮等幻泡萬事猶紛然獨向溪頭立  
潺潺會可捐

胡公墓志一百韻 有序

余夫子胡公諱培字參一號簫卿金陵舊族也  
即故明勳臣東川侯海洋公十七世之孫也公  
生於康熙辛丑三月十九日卒於乾隆甲午六  
月十八日年五十有四門生故舊為立傳數篇  
皆不足知公之平生余慨然思柳下展禽之妻  
之言知夫子者二三子莫如妾之知之也因援  
筆為長句并  
志於墓碑云

嗟嗟一胡君茫茫天地中苦學負異質遂以得奇窮揣  
摩極簡鍊採摭皆精通經史百家義縱橫遊心胸愛物

孜孜誠推心得昭融不喜莊老言不行修養功吟詩多好句鏗鏘氣若虹性剛情高潔幾非人所容慷慨好大義豈小丈夫雄小儒莫窺測機巧用相攻豈知古人道論自歸至公嗟嗟一胡君飄蓬遂西東早即喪慈母飢寒仗阿翁弟妹皆弱齡燈下各忡忡撫諸弟妹恩友愛天所鍾未壯父歿世復以弟天從嘔血至數升親隣憂傷哀二妹繼于歸棄產慮不豐二妹悅且慰憐兄竭已躬艱難自茲極矢心指蒼穹一身將何依浩然乘長風琴劍來白下栖栖訪本宗公本金陵世族於曾祖始遷家於鳩江余族世與姍殷勤叙異逢余之曾祖母即君之曾祖母先君重其人價與瑚

璉同不惜千金子珍重於斯終憶昔伉儷初教以渾天儀分宮並起舍織毫竟不移垂髫愛文字更識有奇書於今廿五年受益良非欺宿昔齊眉好清晨荷鋤隨春風嫋嫋來飄飄衣帶吹開樽發清理揮毫生妙思洗竹於西林種藥於東菑煮茗白日長焚香待奕棊柳陰月未上蟬聲流晚颼沈布冬雲密雪意方垂垂日月不我借鹿門可栖遲君子不我答其志非我窺丈夫處盛世貧賤羞所居愛物心方切能甘牖下隳君本重然諾家計皆慵持解衣即衣人因以竭奩資二十遊齊魯三十燕翼馳陵谷暮煙霧嵩嶽朝崎嶇山川既鬱鬱冠蓋

相飛追腥羶滿道路憔悴君膚肌衾上芙蓉黥表傲不  
勝披蹇驢逐泥濘惟攜一杖藜四十泛海回慙爲匹婦  
嗚困頓青雲志蹉跎髮已絲旣無買山錢萍踪何所之  
秋雨傍蘆汀春寒旅館羈因成詩酒癖或比高陽兒顛  
連時命哉歸來守故籬日積餽上塵常虛近暮炊敗絮  
只自擁安知兒女飢短褐嘯空山富貴浮雲兮一瓢斯  
足矣孰能復低眉少年至白首秋月沉潭姿幾載民病  
疫鄉里共相推聊試九折臂日救千人危不受一文錢  
昂藏丈夫私學道四十年僅僅見於斯吁嗟今已矣人  
盡稱公奇前月犯少微門人私顧悲憂來發感歎斯文

誰繫辭重泉今閉矣干呼竟不知兒女環哀號慟哭青  
天摧雖不及溝壑終同草木萎惟餘黔婁被爲君露足  
施用擬蘭作羹仍將菊作齏湛露和瓊漿爲君奠一卮  
冰桃承琥珀雪藕貯琉璃傷君熱肺肝冷骨今相宜卜  
塋棲霞傍最高峯對茲君子所素尚庶幾無憾遺朝光  
現晴嵐霞彩入漣漪深宵動靈籟清楚引招提長松合  
墓田古栢當路岐白雲流澗底青山四面埤歸此桃源  
境應休元圃基霓旌飄桂香鸞歌繞繡旗左領杜氏妹  
右引董家姬青童邀白羽玉女進新詞湘靈鼓瑟導元  
鳥翼雲麾珊瑚寶璐明月交參差或以青虬驂或以

乘白螭九州任遨遊闈苑待娛嬉君子已長逝捫天將  
告誰迴風傷蕙艸芳歇及江籬登堂誰托孤厚祿故人  
辭孽涕獨徙倚欷歔入空帷鞠躬惟盡瘁無死可支持  
往者已滔滔後來方無涯千古直一日大化同此時太  
息迷一章涕淚橫交頤三兒業未成遑遑怨遭罹二女  
一襁褓嬌怯稚情癡爲此一繫腸塵網復牽維他日終  
其事報君九原期

乙未春三月僮夫人枉駕過訪見余憔悴枯槁知  
窮愁有甚者嗟嘆竟日爲不樂而返感激之下

因成四韻

夫人乃協  
鎮僮公妻

寥落荒園春晝遲重陰拂戶艸離披午厨寂寞情非懶  
親故稀疎義可知驚耳入門車馬至笑聲穿樹珮環移  
殷勤攜手還終日珍重傷懷嘆久離

秋日懷鮑夫人

日落高樓秋氣清水雲遙映暮山橫閒吟只怪詩難就  
誰信思君別有情

魯鳳藻

安徽安慶人

題壁

昨與隣舟姊妹逢香風煖處話從容低頭怕有漁郎至

不看蓮花只看儂

灘頭漠漠起炊烟折罷蓮花正暮天却怪鴛鴦不解事

偏依儂艇並頭眠

隨園詩話新安江寺曾見題壁詩云云未署魯鳳藻三字

有贈

攜得芳枝返故村悔將玉貌共花論低聲還向小姑囑

阿母跟前莫要言

隨園詩話安慶魯鳳藻有贈云云陳夢湘嘲某云畫鸞衫子褪輕紅料峭春寒豆蔻風雙鬢亂雪堆未穩日高猶是背人攏商寶意喜環娘到云藥餌急須調病後珮環親自解燈前金台衡贈妓云春葱欲送玫瑰酒冷媛先教櫻口嘗皆善言兒女之情

曹洪珍

江蘇上海縣人侍御曹錫寶之長女也適海寧

州陳氏詩惜散佚

句

萬古此秋色一天生異香

曹錫寶二餘集序予長女洪珍適海寧陳氏幼亦稍知聲律時學為詩猶憶戊子擬鄉試月中桂詩有句云云予嘗愛其落落大方無婦人女子態今去世已七八年詩皆散佚無存予既不能教之使有成復不能收拾其殘編斷句以貽其子此予之所為深有媿於視畬而不禁淒然長歎也



摘芳集卷之五十二目錄

才媛詩

古歙詠菴汪啟淑選

葉楞 一首

李金娥 句

趙柔 二首

潘本温 七首

計氏 一首

嚴宗光 二首

沈玠 一首

潘冷香 四首

高潔 三首

張玉珍 五首

張毓真 六首

張慧娟 四首

錢復 十首

龔靈香 一首

汪瑾 五首

胥貞靜 二首

梁氏 二首

林桂娥 一首

李媿 四首

屈鳳輝 七首

汪韶 六首

顧啟坤 六首

陸氏 一首

曹淑英 三首

陳貞媛 一首

劉氏 五首

擷芳集卷之五十二

古歛訥菴汪啟淑選

葉榜

江蘇崑山縣人都闔道子葉公女得母張淑人  
教遂能詩文適永州刺史許竹隱第三子心辰  
著有擁翠軒倡和詩集

孤鴈

一聲淒切度河梁不訴離羣也斷腸寂歷寒沙眠鍛羽  
空明霜月照分行無心避患銜蘆荻肯戀餘生逐稻梁  
聞道邊庭尚征戍孤鳴幸勿到遼陽

李金娥

里次未詳

句

折取一枝城裏去教人知道也春深

隨園詩話閩秀李金娥詠路柳句云云湖州高氏女有一聯云也知春色歸人早隣女釵邊有杏花

趙柔

江蘇長洲縣人適進士陳玉基

雨

苦雨聲聲滴寒縵溪南溪北水洄澗產蛙沉竈不忍看  
舟楫如今上人屋農夫有力空嘆嗟無食無衣向誰哭

已愁飢饉絕炊烟况慮追呼受笞辱嗚呼江南卑濕自  
古聞胡爲愁雲慘慘連日閉朝昏

春閨用韓致光無題十四韻寄椒峯外君客梁谿  
繡閣簾櫳靜輕颺拂細塵梅圓鎔雪夜柳裊畫眉晨攏  
罷金蟬顛裁餘翠袖新披圖心自賞違俗性偏真憐影  
衫嫌重工愁黛覺顰世間欺歲月腹內轉車輪雀腦燒  
銀葉魚書送錦鱗午餘剛對雨臘盡又逢春篆體難摩  
漢簫聲孰仿秦行舟休失路去夢那知津茶鬪他山味  
蓴食異地珍嗅花心萬疊拭鏡淚雙勻過鴈應逢客新  
寒最惱人倘詢連日事祇結研爲隣

潘本温

字虹衢號茹芝山人浙江縣人進士潘汝

龍之女適嚴芳園著有桐韻詩刪夢花小草

嚴似會輓虹衢潘氏嫂文略天之忌才豈獨風雅之士已哉不櫛進士忌之尤酷屈指古今何可勝數獨是幼好文詞長宜家室中壽而卒良可哀也同祖兄芳園元配之嫂乃進士椒漁潘公女名本温字虹衢自號茹芝山人而奇慧讀詩書明禮義察父仙遊牽衣而飲泣天昏憑棺而吞聲地裂弔者咸為動容越數載弱弟本松卒既痛其死又憫其才悲從中來此玉折之絲一也年二八賦天桃早識梁鴻牛衣共對安貧而不怨尤織絳助纓悵翁姑已早世祭祀必豐潔一索得男五歲而死慘怛之中此玉折之絲二也子女漸多貧益難支時胞伯汝誠知山東濮州事囑夫婿往依孰意在外者未歸而在家之稚弱天花忽現動云險逆不得已典簪珥

貫衣裳聘名醫調治而市廛適又罹火雖有智者莫能借箸然而百計經營痘固無恙而廬亦成此玉折之絲三也乾隆壬辰胞兄本泰下第南旋忽抱痲疾知而歸寧終無所濟拊膺淚血形神俱毀越數日奉母同歸壻家意欲慰母而已無如日對老母悲兄之念轉深此玉折之絲四也有是四者人非木石烏能久延安得不謂為有天意存焉者乎因檢桐韻詩存并夢花小草殘稿讀之信乎詩能窮人斯非天之忌聞秀更酷于風雅士乎

夏白

長夏南窗卧風來枕簟涼遠聞鳩語鬧近看燕歸忙碧

沼荷錢小幽亭榴萼芳漆園飛蝶夢好句覓池塘

賦得梅花大庾嶺頭發得梅字

庾嶺生春意枝頭乍發梅色連深谷月香散落莓苔映

雪衝寒吐臨風向暖開奇姿依翠嶺疎影冠崔巍竚望  
冰容麗遙看雲岫栽陽回敷帝德好占百花魁

柳線

堤上依依千萬條十分纖麗自飄颻梳風軟弱慵開眼  
織雨辛勤懶展腰綠草平鋪添綠錦紅霞晚落襯紅綃  
樓頭少婦愁相見淚灑迴文機上挑

題天聖寺管夫人畫竹

仲姬善畫竹尤工影寫無塵殿壁東簇簇筠生資腕力  
亭亭玉立奪天功葱蘢能耐凝霜夜蕭瑟真宜在梵宮  
筆勢縱橫枝勁直墨痕濃淡葉玲瓏便娟不礙龍飛柱  
秀媚還須月半籠掩冉銀牆疑映雪紛披金錯恍搖風  
看來今日成陳迹想見當年運慧衷縱使缺無承旨補  
此君已是妙難窮

紅梅

見說春風似酒濃南枝沉醉影重重笑他冰雪羅浮女  
也點胭脂上玉容

紙上美人

靚妝艷服八時新疑是陳王賦裏人避却紅塵遺小照  
相看枉自喚真真

午日

燕雛待哺語雙雙日影輕移過小牕堪笑菖蒲空作劍  
高懸難使睡魔降

計氏

江蘇上海縣人計漢帆女適同邑張永皓

庖厨

婦工四箴之一

織紵之餘庖厨有俶酒漿籩豆膳飲饘粥烹飪必親勤  
率婢僕衣食之原艱難用勗淡泊安分所以養福

嚴宗光

號餐霞浙江長興縣人適沈某詩附見於桐韻

詩刪

題嫂潘虹衢詩稿

春花秋月共評章剪燭西牕擊鉢忙婦德女工長自抑  
最虛心處是羹湯

風流爭羨秀閨房珠玉篇成錦繡腸不櫛無慚呼進士  
頻教人憶舊行藏

沈玠

字珺英號翰仙江蘇長洲縣人著有繡餘草

清明日和如英甥女韻

妝成雅素謝青紅學畫春山向鏡中初試羅衣寒尚怯  
隔簾深避落花風

潘冷香

浙江烏程縣人  
太守之女孫也適同邑某

幕遊久客不歸冷香鬱鬱惟以詩詞自遣著有

集

柳絮

麴塵風起欲何之水北花南弄影時擬託微波驚蝶夢  
半和紅雨惹蛛絲乍添別思飛難定旋引歸心落故遲  
痴絕嬉春小兒女匆匆捉向手中吹

辭却林塘空際漫倦來霏屑一團團應嫌仙蠹生衣桁  
不見鮎魚上釣竿紫陌風暄春漸老翠樓人靜淚初彈  
狂夫何事輕離別輸與纏綿繞畫闌

榆莢拋殘剩綠條淡雲漠漠雨瀟瀟愁聯汴渚參差樹  
夢逐邗江上下潮爾日心情同客醉異時踪跡亦萍漂  
最憐舞入吟牕去好爲幽人破寂寥

東風作絮自紛然畫出江南三月天野店撲殘輕似霰  
蠶村綴却白于綿餘情未了隨流水一點相親在別筵  
記取木蘭舟上見絲絲金縷染汀烟

高人潔

字清修詩見谷音傳響

孫貞媛詩

荼苦甘如飴蚤歲多飄泊待字甫及笄何又置身錯  
烈女花前殞仙踪月下招清寒堪自訴橋畔品瓊簫

次韻題明妃圖

別來故國淚偏稠一女遙臨萬里秋此去盧龍終不返  
馬前敲斷玉搔頭

張玉珍

字藍生江蘇華亭縣人張夢喈之第三女也適  
婁東刑部副郎金垣子鋤九歲卽工詩著有得

樹樓稿

夜坐

簾開夜氣涼庭院雨初足蛩聲一何悲幽咽鳴牆曲輕  
風出遠林微月淡深竹心清境自閒身暇意不俗寂坐  
此燈前復理殘書讀

白杜鵑

謝豹花明玉砌前買來應費沈郎錢三更鳥喚胭脂盡  
一樹妝成縞素妍露欲融時香弄影月初斜處淡無烟  
鶴林仙子今何在開遍江南穀雨天

夜雨

捲簾涼榭驅塵囂銅壺箭急金徒驕夜深冰簟不成夢  
打牕猛雨風瀟瀟此際離懷向誰道欲寄相思拾香草



明朝試起看庭前落紅萬點和愁掃

和天台雅集韻 選二首

主是谿山游者賓盍簪贏得去來頻花閨爭咏飛仙句

月滿平坡路似銀

仙山從古忘春秋前後何妨兩度留澗水斜飛元鶴舞

桃花應笑客科頭

龍山詩話予友張參軍玉壘博學工詩詰似與載亦善吟咏其詩余俱遴入盍簪集中玉壘嘗邀余賞梅塔射園酒次謂余曰予長女玉珍性嫺靜嗜讀書閨閣之中日以吟哦為事遂以其詩見貽予攜歸篝燈閱之見其氣清調逸味餘酸鹹頗有孟山人遺意因錄之以為徒事鉛粉者勸初夏云境靜塵偏少人閒與不窮梵聲古寺外鳥語夕陽中荷葉新抽碧山榴乍放紅眼前風景好留取醉詩

張毓真

字幼爛江蘇華亭縣人張夢喈第四女也適諸

生朱光耀

和天台雅集韻

駕鹿乘雲世外賓烏衣佳話後先頻筵開一片蟾光皎  
水綠山青盡化銀

王謝遺墟冷暮秋何人屐齒爲遲留仙風重引今朝會  
流水桃花滿澗頭

玳瑁梁間燕子歸花香偏撲玉人衣悠悠仙曲風前度  
那數霓裳步月輝

無邊佳境信仙寰莫怪劉晨去不還飯煮胡麻尊玉液  
橫枰卽是爛柯山

洞天清曠足逍遙樹影參差花露飄恍入廣寒原有路  
不勞公遠架仙橋

小住蓬瀛世共知雲輶去後繫人思官清便是真仙客  
莫話天台羨昔時

張慧娟

字靜山遜亭張鳳喈第六女也字吳用槐子以  
晉尚未于歸著有生香閣詩草

對月

簾外添清景窻中暗短檠倚欄遙送目一片雪霜明不  
見姮娥老先看桂樹生宵深露盈袖疑向畫中行

中秋

集詩牌

曉霧遮斜逕風回爽氣迎放吟耽下釣停繡愛茶聲剩  
竹街樓靜餘蟬隔浦鳴紅輪才墜遠闌外映蟾清

秋海棠

低倚牆根瘦不支淚成紅血染枝枝背人欲向西風折  
腸斷空階月上時

中庭寂寂露華妍翠羽明璫艷若仙一種幽情描不得  
秋風吹汝又今年

錢復

字吹蘭浙江嘉善縣人查香雨開繼配也

查香雨桐花閣話別詩序將離都尉感每甚於  
河梁賦別江郎情自深夫閨閣况乎三年鴻案  
薄有倡酬千里燕臺暫辭伉儷雖狂生彈鋏恥  
為遊子之顏抑織婦鳴機不悔封侯之計然而  
一樽桂酒六尺蒲帆別窗下之唵椒企天邊之  
仙桂望白雲兮紅樹未免有情對黛管與形奩  
誰能無累離亭折柳偶成七字以攄懷內子吹  
蘭旋集十章而作答且喜別離之際不忘倡和

之思聊授棗梨合藏笥敢冀傳彼好事得  
教寶軸裝成庶幾嗟我懷人長展玉臺新咏

送香雨赴試北闈

溪上扁舟繫綠蘿

許渾

朝聞遊子唱離歌

李頎

好攜長策干

時去

譚用之

擬占名場第一科

劉三復

搖鞭休問路行難

王初

金絡青驄白玉鞍

萬楚

詞藻世傳平

子賦

皇甫冉

君行當得遠人歡

權德輿

黃金瑞榜絳河隈

李嶠

遠聽明君愛逸才

張說

想到長安誦

佳句

竇叔向

氣衝魚鑰九關開

沈佺期

清都草木總榮芬

張說

樹發寒花禁苑新

鄭愔

聞有故交今

從騎

楊凝

封名直進薜蘿人

王建

休憐柳葉雙眉翠張祐莫慮功成不拜侯章孝標鴻鵠羽毛

終有志李紳丈夫不合等閒休楊半

知君到處有逢迎高適馬上題詩卷已成法振惟有深閨憔悴質薛逢不知何處是前程趙嘏

雪照南窗滿素書許渾起挑殘焰獨躊躇黃滔竇家織婦慚

詩句李紳欲報瓊瑤愧不如司空曙

日暮風吹山女蘿戴叔倫無由縮地欲如何元稹遙知別後

西樓上白居易鴈引砧聲北夢多李紳

數邨殘照半巖陰許渾行矣關山方獨吟李商隱今夜月明

何處宿許渾只應偏照兩人心劉禹錫

對君衫袖淚痕斑岑參庭竹疎森玉質寒王獻此別更無他

事囑吳融銀鉤數字莫為難崔峒

龔靈香

詩見谷音傳響

次韻題明妃圖

別殿笙歌寵幸稠一般璧月照三秋如何棄妾金沙路

匹馬長征不轉頭

汪瓘

字催弟浙江烏程縣人道德清國子監助教徐

以坤著有修竹吾廬詩

從茗返德清

秋思入寒砧帆飛度遠林溪分前路合桑密晚烟深白  
髮慈闈夢青年昧旦心孤城遙在望鳥外見雲岑

懷舍弟都中

上苑棲枝後春風又一年鴈行悲斷續雲路戒騰鶩母  
老憑余侍門衰仗汝賢家庭為政好早放潞河船

嘲柳

却笑陶彭澤空傳五柳名看他風過處腰折善逢迎

答夫子

飄飄詞賦欲凌雲健筆誰人得似君齒冷兒曹能食肉

舉肥只今讓紛紛

詩籤藥裏間茶鐺方丈維摩得坐忘我是散花成法喜  
鹿車挽處共徜徉

胥貞靜

江蘇江寧縣人

題望雲閣詩後

幽情吟遍付飛鴻迢遞慈幃有夢通目送白雲千萬頃  
幾年樓閣鎖春風

新詞落紙盡珠璣把卷相看識異姿從此三秋涼月夜  
小齋遙唱謝家詩

小梁氏

名素書浙江仁和縣人直隸縣梁夢善明

府之女也

秋草

零露灑兮秋可憐醒頭誰取作花鈿石欄濕共涼苔雨  
金谷疎隨暮柳烟不穩蛩藏吟夜夜幾番螢化惜年年  
湘裙六幅全收拾門草無由見麗娟江南婦女春夏取  
草為飾名醒頭草  
為多憔悴感芳華往昔曾經襯落花淒惹寒烟籠蟋蟀  
冷和明月葬琵琶無名江岸凝空翠有影池塘蘸淺霞  
未忍薙除留砌側亂隨墮葉滿山家杜詩無名  
江上草

林桂娥

詩見谷音傳響

次韻題明妃圖

欲撥琵琶怨更稠玉關何地不傷秋天南漢闕分明在  
却恨黃沙罨馬頭

李媿

字婉兮詩人李漫翁其永女江蘇吳縣人適諸  
生陸昶著有琴好樓小製

懷清溪任夫人

楊柳澹春陰池塘過疎雨所思人不來悵悵徒延佇洞

庭看落花花落已如許好鳥自嚶鳴不解離情苦

送梅垞之白下

脚踏江畔別愁深落月蒼蒼曙色侵笑我祇堪謀斗酒  
憐君惟有載囊琴秋風矮屋三條燭夜雨寒窗十載心  
想到歸期真可負桂枝香裡細聽吟

春閨

春寒料峭病恹恹愁到眉峯兩碧尖妬煞呢喃雙燕子  
尋巢依舊入風簾

題梁溪孫旭英峽猿集

花落江城水亂流繡餘一卷獨悲秋分明風雨嘉陵夜

腸斷三聲在嶺頭

屈鳳輝

字梧清浙江平湖縣人適胡之垣早卒著有古

月樓詩鈔

胡德所冢媳屈鳳輝小傳屈氏名鳳輝字梧清  
上舍餐霞子長女歲在壬辰歸垣見為室至其  
伉儷之重相愛亦相敬實有逾于古人所云者  
所居樓三楹當夫月夕花天秦簫互答真令人  
有天際乘鸞想方謂宗祧永賴慰我夫婦暮年  
不意涉秋邁疾醫禱罔效歿之後老姑長慟廢  
寢食者累旬幾難可以解憂此雖大過乎情然  
益可知其平昔已自女紅鍼指外尤酷嗜吟咏  
拈弄筆墨每肄習所業樂府古今體詩至午夜  
不輟其音余嘗戲語諸少子曰汝曹似嫂之用  
功深不早收效遠耶之垣痛悼之餘忍淚點檢  
篋衍得古今體詩若干首稍為節汰以付剞劂

云氏

屈宗到古月樓詩鈔跋略余妹梧清幼而性慧  
好事仙佛髻齒即工吟咏長字胡君湘雷結禱  
後析疑問奇相得無間而紅牕繡戶唱和無虛  
日蓋其素好然也巳亥七月忽染時疾以湘雷  
赴省試瀕行強起梳櫛嗣復力疾寄書言已漸  
愈屬續前一日莫菴弟至呼之前曰為我謝慈  
親天明當即去爾天既明而果逝嗚呼此豈無  
夙因而能然耶梧清少嘗奉列仙像求所謂真  
訣者矣既而清齋繡佛更似深得淨理則其於  
死生之際脫然遠引類非無夙因而能然湘雷  
又奚悲焉

晨起

夢覺一燈淡晨光動前楹余亦自此起推牕知天晴巾  
櫛雜花氣活火烹茶聲好風東南來山鳥時一鳴日出

照樹杪露葉含餘清坐觀羣動象因知天地情

憶妹

高樓見歸雲悵焉不能語思我同懷人胡為謝儔侶却  
立既屏營臨妝復延佇豈伊川塗濶無乃音塵阻冥鴻  
不速回天風淡容與夕鳥一聲來翻飛下平楚

月下吟

明月當空照高閣皎潔青天雲淡薄兩部蛙聲歷亂啼  
金螢翻覆簷前落沉沉冷露滴疎林宿鳥一聲烟漠漠  
聽盡殘更夢未成燈花不動明珠箔人生百歲幾多時  
誰是朝朝瓠樹枝君不見南國春江留艷曲只今唯有



月明知

人日喜晴

碧海起朝暎靈辰絕雨痕年光猶臘尾生意動天根玉  
蝶梅舒萼紅螺酒滿樽草堂吟咏後春色爛平園

洋鷄

也有啼聲出苑牆攜來毛羽話殊方短籬小試籬中翻  
五夜寒驚海外霜莫倚花冠爭飲啄敢從金距鬪文章  
可憐舊侶今何在萬里波濤是故鄉

水曹清暇錄閩秀屈鳳輝字梧清浙江平湖縣孝廉  
屈宗到之妹也所著有古月樓詩鈔工於咏物其洋鷄詩云云  
其又咏美人蕉詩云冷翠捎牕月影通珊珊弱骨不禁風芳情萬縷深如海併入柔

心作碎紅皆清新可誦

夜深

夜深露氣透迴廊季女花開逗晚香斜月半簾殘酒醒  
越羅衫薄峭生涼

中元有感

秋風慘淡雨蕭條漸聽隣家哭寂寥我有童烏傷逝淚  
暗牕無語自魂消

汪韶

字井桐號倩君安徽六安州人原籍歙縣適詩人洪尋卒年三十有四著有集

和楊姊端一病起原韻

錦鯉傳書尺半長  
來時分破水烟蒼  
知君病比黃花瘦  
贈我詩真白雪香  
讀向緇奩醒倦眼  
和拈彤管索枯腸  
碧冷似與西風約  
細聽琮琤在畫廊

靜室無塵境是仙  
花枝茗椀總清妍  
閒敲玉局銷殘暑  
忽憶金臺隔遠天  
對月何心揮綠綺  
思親有淚滴紅牋  
幾時蓮步過蓬戶  
共檢華陽士女編

春柳

春雨春陰二月天  
萬條臨水碧于烟  
小蠻腰樣依然在  
漫舞東風瘦可憐

金絲斜拂玉欄干  
珠露初收淚眼乾  
偶向粉紅簾下立  
春風吹面不知寒  
長日三眠夢醒遲  
深情不許燕鶯知  
銀牆低處風梳掠  
未縮雲鬟綠萬絲

近日眉痕畫也羞  
空勞搖曳傍妝樓  
新詩欲寫東風縷  
一縷東風一縷愁

顧啟坤

字順貞浙江仁和縣人適徐昇著有鳳臺草

落花

花落溪水中  
水流花不住  
寄語水中花  
莫向前村路

雁

愛暖隨陽至乘春背北棲尺書難自托藉爾寄金閨

新柳

幾枝翠柳灞橋東新綠依依映玉驄忽見垂條低漢苑  
不教飛絮出隋宮章臺日落人初別羌笛催春曲未終  
且喜蛾眉今尚淺莫令腸斷拂西風

垂釣圖

泉聲曲澗映斜暉散髮垂綸暮不歸地異廬山能避俗  
心同渭水可忘機桃花片片浮春浪楊柳依依拂翠微  
莫說臨淵多所羨身閒原與世相違

送東建夫子北征

君去幽燕山外山行裝檢點淚斑斑頻看京兆香螺筆  
閒殺蛾眉月半灣

桐葉

牕外梧桐一葉飄早知秋色漸蕭條攜來題就新詩句  
擲向江頭趁晚潮

陸氏

名易遷江蘇上元縣人指揮徐大年之室也著  
有綠窻偶吟

題漂母圖

古今多少明眸客不及青山老婦心一飯豈殊黃石履  
淮陰只解報千金

曹淑英

字華玉安徽歙縣人適尹山程怡堂

秋夜偕夫子小飲

灑氣宵來爽明河耿欲流有懷常不寐薄醉暫消愁砧  
響千家月蟲吟四壁秋家貧爲婦易斗酒幾曾謀

對月

細雨初收露彩蟾碧雲如洗影澄鮮南樓凭遍闌干夜  
半可愁時半可憐

秋海棠

冷艷疑經雨嬌羞欲避人牆陰閑自媚榮落不知春

陳貞媛

江蘇通州人適馬錦林

雪屋吟

凍雲壓屋倒城根龜手兒啼血裂痕儂是寒鷄常抱卵  
任他風雪只關門

劉氏

名蘭馨號綺石江蘇淮安縣人適聶皓著有菴  
餘偶得

聶皓術餘偶得序略內子綺石難女也年未笄  
遭家變携老婢跋涉南北風塵間卒能脫母於  
禍事寢歸余隨瀕及焉又復轉輾保護越五年  
其勞瘁憂思幾無片刻安蓋并古今之愁城苦  
海所謂墮入羅刹國中者余與內子共嘗之內  
子幼喜讀書雖冰礮中未嘗一日廢至是以抑  
鬱慘怛之忱不得已而託之謔咏皆從肺腑中  
流出不自知爲詩也間嘗從諸君子後聞教於  
三百篇大半孤臣孽子勞人思婦之什居多吾  
內子處人世不堪之境竊願見之者哀其遇悲  
其志破無知之口發不平之氣使一點靈  
臺不致泯滅是則余兩人之厚幸也矣  
袁明府枚甫餘偶得題詞閨閣吟詩最易傳播  
况作者藻思夙具耶加以精進之功將使劉家  
三妹不得  
擅美于前

有感

花信風催春已暮無情密雨頻相妒院局雙扉復下簾

苔滋生綠無人顧裊裊鑪烟一縷輕閒推簿上三生悟  
展卷翻添舊日悲斷腸愧讀曹娥賦夜夜離魂繞芍陂  
三更怕聽子規時何年荆樹花重發空念親幃淚暗垂  
幽閨回首路迢迢綠竹欹斜伴寂寥攬鏡自驚雲鬢改  
晚妝誰復翠眉描歡容最怕愁中劇况本生來慣愁處  
演到關雎歌燕爾十朝羽檄催人去悲歡離合皆常事  
珍重別時休注意忠信曾聞厲呂梁天真那怕讒珠惹  
語罷陽關聲斷也幽懷懶拂雲箋寫眼底忽驚素雪飛  
一望銀川迷四野琴書冷落聊爲伴故鄉杳渺音書斷  
款戶乍驚內客來連宵塵約埋空館一陣誼譁笑語聲

紅裙作隊覺風輕  
投機無語難相洽  
勉整殘妝出戶迎  
到此嗟吁真無那  
老嫗入坐斜如卧  
燭盡茶乾星散後  
侍兒呼起掃餘唾  
幽思輾轉夜將闌  
百折柔腸欲話難  
雙丸如駛空虛度  
滄海桑田不易看  
靜讀離騷空憤恨  
綠蕉人事寧須問  
夜深好句寄梅花  
枯枝雪裡偏丰韻  
買山有愿知幾時  
墮我紅塵去意遲  
拂亂有何大任來  
彼蒼生我欲奚爲

夜雨

漏盡爐烟裊殘燈  
總不明瀟瀟魂欲斷  
點點夢難成  
舊恨同雲障  
新愁觸緒生  
無情惟夜雨  
和淚到三更

水仙花


水石生平性清芬  
綴幾枝黃冠新受籙  
翠帶乍低垂  
蘭葉爭春早  
梅花破凍遲  
丰標全在眼  
莫漫憶陳思

贈義俠嵐峯邵人

青天碧海恨茫茫  
幽怨難教話短長  
涉險履艱寧已事  
披星戴月爲誰忙  
古心發處人如學  
浩氣生時道合剛  
自昔草茅多節俠  
安能國史盡評章

挑燈

挑燈閒坐到更殘  
擊柝頻聞夜向闌  
雲破小窗明月上  
滿庭花影壓欄杆



水 游

水 卷之五十二終

擷芳集卷之五十三目錄

才媛詩

古歙詡菴汪啟淑選

屠蒞佩 一首

黃 桂 三首

王瓊瑤 五首

程 珮 一首

周淑英 四首

王 芸 一首

衛學漪 一首

朱 氏 句

葉金支 四首

戴韞玉 八首

朱 氏 六首

孔昭蕙 四首

程 雲 五首

顧韞玉 十首

袁 杰 一首

吳惠姬 句

歸懋儀 七首

擷芳集卷之五十三

古歛初菴汪啟淑選

屠蒞佩

字瑤芳浙江秀水縣人適孫渭璜著有咽露吟

鈿奩遺詠

攜李詩繫屠蒞佩字瑤芳德貞子婦文學孫渭璜室著有咽露吟鈿奩遺詠其小詞情思婉約不讓乃姑

觀沈氏諸姬演劇

梨園喜見屬紅妝三五娉婷出洞房檀口鶯聲歌細細  
柳枝蝶態舞將將冠簪雅步叅軍度粉墨塗顏儉父行



底事酒闌人未散月明照徹錦雲裳

黃桂

字斌英安徽休寧縣人黃中翰松之女弟也適嘉興何某著有吟牕集

走馬燈

八駿如環結陣行元宵飛渡寂無聲  
枚當銜處軍中令戰欲酣時紙上兵  
汗馬不嘶秦塞月嚴裝猶憶亞夫營  
華堂此際燒春宴武備分明賀太平

庭梅

花信初番暖尙微一枝瘦影倚柴扉  
瓊姿只合生幽處不許時人問是非

憶兄

鄉書欲寄鴻難托何事秋歸兄未歸  
兩見重陽人寂寂菊花叢裏對斜暉

王瓊瑤

江蘇常熟縣人僉憲黃岡王材任孫女也適徐某著有初餘漫草

咏梅

暗香疎影畫難傳漠漠長含庾嶺烟  
冷淡甘居羣艷外清高合占百花前  
一枝籬落黃昏月半樹溪橋暮雪天

留待和羹他日用莫教點額作花鈿

次韻早秋雜興

新涼天氣減炎蒸蕩漾扁舟興可乘  
幾處蓬蒿明積火一叢蘆葦閃漁燈  
踈桐夜雨愁更漏衰草平原感廢興  
自愧短才慚咏絮品題風雅亦何曾

長堤楊柳葉初凋空對秋風倦舞腰  
小院露寒蟲咽砌官河潮上水平橋  
詩書僅可供吟咏鍼線何妨遣暮朝  
最喜嫩涼宵漸永閒吟不嘆夜無聊

庭前已見桂舒黃漠漠連村稻穗香  
紈扇尙搖三伏暑羅衣漸怯五更涼  
草根淒切蟲鳴露竹影扶踈月過墻

貧淡家風惟紡績可能東壁借餘光

金風颯颯動高秋景物牽人不自由  
霽色凝烟山疊疊湖光鋪練水悠悠  
差池雁影來天外酸急蟬聲抱樹頭  
餘有詩情堪續處數聲清唱採蓮舟

程珮

詩見陳氏旌節錄

賦頌新陽陳母張太君

寡鵠歌殘百感增天留弱息振家聲  
卅年介節全宗祀千古徽音繼父兄  
閒氣至今原不死苦心當日忍餘生  
雲中佇見飛鸞誥寶婺星光徹太清

周淑英

字晚芳浙江山陰縣人周雪溪之次女也適同

邑宋秀才西椒工繪事能詩詞著有藏香閣詩

草江行紀事

周洪周孺人行略孺人姓周氏為候選縣佐西  
椒公德配太學生雪谿周公女也嫻內則通書  
史母朱太孺人疾亟封右股以進岸舫公聞孺  
人賢遂訂絲蘿于歸後孺人則孝舅姑相夫子  
巨細家政靡不親操既而岸舫公以司馬借署  
掌教須江孺人則一一措置凡賓客之奉米鹽  
之徵賦獲之用悉合於度岸舫公課弟勤著述  
每夜燭跋未休孺人則刺繡具肴酒以俟迨岸  
舫公邁疾孺人封股和藥以進服之而愈閱三  
年復病孺人仍封如前因創重大潰家人始知  
之及歿經營喪祭咸合於禮既歸葬家益貧西  
椒公入都謁選母丁太宜人已高年孺人奉盤

匱潔滄瀧晨夕承歡如是六年西椒公需次銓  
曹惟返空信孺人則宵晝紡績悉鬻衣飾以供  
甘旨時值溽暑質牀幃而不顧太宜人八十有  
三老年嬰病孺人侍藥之外穢必親滌丁太宜  
人歿治喪一如在須宗黨僉稱孝婦先是西椒  
公無嗣孺人于歸逾一載即勸公納妾勿允遂  
自娶華氏女與公久亦不娠公抵金陵相借於  
寓孺人不謀於公再聘荆溪國學生夏介人次  
女為副即今德本生母也公至七十連舉六子  
孺人撫之一如已出孺人綺歲善繪畫工吟咏  
有藏香閣草江行紀事諸編孺人  
名淑英字晚芳少西椒公一歲

和夫子原韻

女誠嚴從一琴心笑兩娛非關矜楚璞祇恐混魚珠萋

錦讒無益葵丹矢此區幸成嘉禮後白首相俱

宋晟初婚示內詩舉案休嫌晚兩心聊自娛延津  
無逝劍合浦有還珠舊業書千卷清貧花一區鹿

門能共隱與  
爾笑相俱

送夫子之江南

非關兒女學牽衣為念高堂近古稀  
記取故園梅信早  
一颿侵曉渡江歸

讀白頭吟

求凰一曲見奇才誰遣私奔夜自媒  
莫賦白頭嗟薄倖  
有人泉下早心灰

咏梅

一枝踈影倚東墻獨抱貞心對夕陽  
桃李漫誇凡艷好  
高山流水自然香

王芸

字香牕號苧西女史江蘇華亭縣人

題駢枝萱花

一本靈萱簇五莖聯輝直欲媲娥英  
便方桂苑應無讓  
况擬蘭林倍有情慈母堂前看作餅  
小姑厨下許嘗羹  
綠窻笑逐陽春後取琰於岷想已傾

衛學漪

詩見谷音傳響

次韻題明妃圖

買賦長門費自稠阿嬌重入漢宮秋  
畫工不諒閒妃苦

尚索餘金納袖頭河嶽重人萬宮煇畫工不病閭敗苦

朱六氏張氏改圖

名景璧江蘇華亭縣人隱士景輔之妹也所適

無考

何母節孝詩

何協妻王氏協客死王事翁姑極孝撫子成立廿年備嘗辛苦

箜篌聲裏路漫漫腸斷天涯八節灘辛苦海山銜木盡  
漂搖風牖徹桑難小樓績火蓬雙鬢寒夜書聲膽一丸  
孤塚北塘芳躅在苔碑誰拂舊書丹

葉金支

字秀華江蘇南匯縣人葉中翰鳳毛之次女也

適上海曹國學錫宸著有效顰集

賦得夏雲多奇峯

燃石火雲升撫時當盛夏水中龍氣噓天上鰲山駕渾  
疑似三神或道是九華縹渺夾日飛蔚蒼補天罅千里  
目不窮百變人爭詫削成非人工鞭走屬造化何當無  
春秋常此竟朝夜願為興霖雨膏澤普天下

留春詞

春光未至憶春生宜春貼額將春迎春光漸隨鶯燕至  
春愁黯黯傷春情望春常願春光好當春却怕春光老  
憐春愛春春莫歸春歸何事今偏早春去春來無盡期

春來春去最相思明年更遇春光好願得春憐佳少時

題大人水竹居

止水疎篁裏蝸牛一小廬栖遲忘歲月娛樂有琴書戶  
外澗芳襲階前林雨餘閒雲無去住日夕對清虛

秋閨

砧杵聲中暑乍收露華清共碧雲流寒生羅袂停紈扇  
月滿湘簾掛玉鈎楊柳亭前烟漠漠芙蓉江上水悠悠  
含情不語愁今夕目斷關山鴻雁秋

戴韞玉

字西齋浙江烏程縣人觀察戴卯君先生之長

女也適司馬陳淞早卒著有西齋遺稿

周堽西齋女士傳女士名韞玉字西齋茗水觀察使戴卯君先生長女光林孝廉姊陳半江孝廉內子也歲丁酉觀察配沈淑人夢晉太傅謝公女遺紫玉半玦遂生女士因名焉女士生有異資輦絲初卸輒嗜書涉文翰其尊人由詞館遷侍御旋秉臬晉陽調江蘇女士得偕仲弟侍所生足跡半南北所至攬山水勝概故不以閨氣囿先是錢塘學士陳緘菴先生之嗣君麟哉太守與卯君觀察同領辛卯鄉薦篤譜誼會丁酉浙闈不戢太守罹冤案罪瀕死桎梏獄中觀察往與晤義不易死生訂以已女字其子時皆在襁褓聞者奇之已而大獄息陳得無恙而家且罄如矣女士閱覽益博詩益工半江文名益盛丙辰春兩人年俱二紀當奠雁即就婦翁署成禮凡十年前後舉三子一女半江以先業凋落砥志名場而南戰屢斥女士亦甘藿茶脫簪鈿為良人負笈助歷戊午辛酉京兆復不利甲子與女士弟光林北上光林捷而半江又躓以

書寄女士蓋已作焚舟計矣是歲也觀察謫守  
 澗州女士不能從又不獲大歸於陳廼僑寓錢  
 塘之復園得書憤惋又半江每一落解輒殤一  
 子至是無遺雛女士窮子無生趣作長歌行幾  
 千言述往歎今聲淚俱逆復作書達澗有恨不  
 為男更恨慧根識字之語大約數益奇志益激  
 而詞益佛振不能平卯君觀察懼其以憂灼戕  
 生也覆札規之尋郵資都門招半江來澗歲乙  
 丑半江歸自杭乃挈女士入粵自鵬閣丙寅夏  
 四月抵澗中間逾嶺涉海所在多倡和然女士  
 素病噎今且以憂鬱委頓艱劬之軀處之蠻烟  
 瘴雨間至澗甫閱月病棘遂不起時年止三十  
 也明年丁卯春半江攜女士櫬歸厝於明聖湖  
 庄檢遺篋得西齋詩詞若干首都為一卷秋復  
 走京師始登賢書而女士已不及見矣因出所  
 遺詩卷乞誄于都下名公卿見者皆太息投詩  
 盈帙疑為道  
 韞後身云  
 戴文燈西齋遺稿序西齋遺稿者亡姊韞玉之  
 所作也姊幼而嗜書年十九歸于陳子半江中

間隨吾父之晉之吳官舍迨後寓居茗水而半  
 江方奔走于幽燕豫章之間常怫鬱不得志姊  
 之心重以悲悲無所托廼悉寄之于詩故多感  
 憤無聊之語若逐逐臣之放廢江潭若故侯之仰  
 天扣缶抑塞磊落觀者殆忘其為巾幗也其亦  
 可傷也矣嗚呼以彼其才視世之擁魚軒膺綸  
 翟者亦復何限而區區者曾不之界且即不豐  
 于所遇亦當優游于歲月不益工其所作乎而  
 年不過三十集不過一卷竟以是卒業也悲夫  
 悲夫余自丙辰以後三踏省門輒報罷幽憂之  
 疾寓之於詩姊見之未嘗不稱善方之申申之  
 詈殆有勝于古人而故帙依然砧聲已杳魂兮  
 歸來徒招諸要荒之外尙忍言哉存日拈筆甚  
 多恒不自藏弄今其遺者為半江所掇拾故有  
 未經點定者余謂存其真乃所以存其志其志  
 有耿耿不忘者將使後之人迴腸蕩氣知當年  
 之辛苦如是而半江之所就更進乎今  
 益以深其華屋山邱之感也不亦可乎  
 朱大紳西齋遺稿跋吾友陳子半江悼亡之明  
 年始捷北闈為余言輒掩面流涕哀孺人之不

及見之也。比讀西齋遺稿，詢之乃其孺人戴氏。生平感遇之所為，作節哀音，短翫激越，大抵  
 憫半江之不遇，思激發其志氣，以成其名。蓋雞  
 鳴昧旦，有三百篇之遺意焉。當夫三鳳初鳴，一  
 椽僑寄，留武林而不得望苕水，以難歸嚴親，有  
 柳州之謫，夫婿抱劉蕡之傷，往省潯江，遠踰嶺  
 嶠，關河修阻，經途幾千，有若逐臣，放廢孤子，流  
 離稍焉，傷懷詩以見志，其可悲也。已迨幽憂而  
 卒，尋以櫬歸西湖邊，香魂不返，半江六年賦悼  
 至今，猶有餘悲，是固情之所鍾，千古同歎也。  
 阿文端公題詞：我愛閉門陳正字，風流儒雅足  
 人師。携來一卷西齋艸，都是齊風雜佩詞。深閨  
 何事問青天，習禮明詩不永年。寄  
 語悼亡潘騎省，千秋彤史足流傳。  
 雲巖公相桂詩：白雲嶺外望將穿，紅豆詞成倍  
 黯然。收拾珠璣零落後，空庭夜月聽啼鵲。巾幘  
 何嘗少丈夫，揮毫翻恨是名姝。健  
 翎縱使凌雲去，贏得青青草滿湖。  
 陳世倌題詞：阿咸幼就書高志，切霄漢射虎上  
 南山。騎鯨游滄瀚，赤幟樹文壇。何止走三戰，嗟

伊閨中友，黽勉牛衣，畔紙筆或聯吟，寄遠時濡  
 翰，至情所深，鍾繩武入東觀，詎意發軔初，幄裏  
 餘香散，縹帙空復存，徒增悼亡歎，悼歎亦何  
 為。努力償宿願，遺徽應未遙，依舊明星爛。  
 汪由敦題詞：斷粉零瓊幼婦辭，凌雲高格陋燃  
 脂。槐花秋冷深閨夢，蕙草春闌遠道思。十載鏡  
 奩遺藻在，千秋彤管賞音知。最憐  
 憔悴南交守，腸斷庭前咏絮時。  
 梁詩正西齋遺稿題詞：秀齋往日留芳躅，今日  
 西齋又繼踪。自是太邱家盛事，女宗盡合作詩  
 宗。閨中孝道兼柔道，筆底長歌續短歌。  
 閒眺青雲增悵悵，不關新樣學元和。  
 陳邦彥題詞：馬嘶駝走千輪鳴，軟紅十丈填南  
 榮。案頭忽遺詩一卷，三復蘧廬無俗聲。閨人自  
 是茗溪秀，說禮名家次仲胄。清宵織素阿翁偏  
 才華咏雪阿兄右，作配我宗小阮來。顏巷蕭條  
 綴紫苔，早晚食貧操井臼。倡酬拈韻贈瓊瑰，西  
 山南浦空相憶。峒花狔鳥情何極，藁砧未列佛  
 名經。滿腔塊壘誰消釋，一朝鑑缺桂輪殘。寂寞  
 西齋白日寒，孤嶼風吟淒翠竹。斷橋水溢咽朱



闌宵來發女光慘淡長安此日詩爭覽

定知格異玉臺詞我欲攜之鐫琬琰

紀昀題詞孤墳葬去一枝紅烟艸年年泣曉風

惟得詞人多命薄香閨也被作詩窮硯匣琉璃

鎮日隨含情空付斷腸詞珠樓翠箔王侯宅羅

綺春風屬阿誰長歌一曲寄幽情鬱鬱埋香意

不平彈劍為君歌慷慨悲風夜半捲孤檠茗溪

流水越山青烟雨霏微入杳冥應有詩魂銷不

盡黃昏梅雨影亭亭

汪存寬題詞窻裏研朱共校讐簪花筆格舊風

流銘椒賦菊難重見珍重西齋一卷留高堂遠

宦悵分攜翹首吳山望欲迷盃手作羹空剋願

芳魂應繞鏡湖西長向金臺望眼穿秋風秋雨

倍纏綿裁成錦字憑雙鯉一語叮嚀意萬千鵬

飛夙識搏風遠鳴唱猶傳戒旦頻此日九京堪

憫藉果知夫

凌應會題詞咏絮才華織錦心試拈斑管淚痕

深都因伯玉長安市幾度秋風欲碎琴露浣菴

薇佩紉蘭娟娟修竹倚天寒最傳秀句蠻雲白

純素飄零墨瀋殘短調長歌雜羽聲依然健筆

意縱橫也同精衛思填海棋局中心自不平莫

嘆秦嘉上計遠天香攜得一枝歸何因報與金

泥帖門鎖葳蕤冷總緯却披明月憶前塵我亦

會傷奉倩神題罷江南斷腸句相看留得苦吟

身西齋一帙伴君回行到西湖問劫灰

近說麻姑寄消息曾經三度淺蓬萊

休洗紅

休洗紅洗紅滿水鴛鴦錯認錦機絲驚開雙宿還雙

起君不見昔時顏色勝朝霞數遍紅榴未足誇東家買

來嫁小女新樣粧成嬌伴侶比花翻酒能幾時脂光褪

盡不我與蒙塵浣路誰復憐從此空箱永棄捐人生榮

落亦如此何堪貧過桃李年又不見田家女兒衣布帛

掛芳集 卷五十三  
辛苦織衣良不易一澣再澣湏不緇為絺為綌心無斃  
人能富貴視危機茶可食兮絮可衣手把殘紅掬流水  
從今願化雲煙飛

### 長歌行

甲子外君下第長安余避迹園居蕭條無狀因  
憶往事恍如昨日作長篇以誌之

對人未語愁先至擁髻為君談舊事兒家本住白蘋洲  
水抱城圍金屋邃門前垂柳綠參天牕外桐陰青覆地  
阿父平生好交情文情為重黃金輕擄蒲一擲傾百萬  
座中客滿尊常盈太邱裘馬豪公子蕊榜同登交結始  
金谷春深挾彈遊紅樓日晏踏歌起追隨暮暮復朝朝

忽爾風風還雨雨公子無端作楚囚含沙射人難自由  
獄中片言訂姻婭丈夫一諾如山邱盆冤洗雪從戎去  
故人平步登瀛洲白簡紫泥名姓錄全家盡食千鐘粟  
東垣西驛拜殊恩三晉兩江平讞獄蘭閨女長性耽書  
十年不動窺園足偷隨阿母額塗黃悄學姬人眉畫綠  
高堂愛惜比掌珠縷衣新樣映羅縠也道民飢當食肉  
不知菜苦更名茶彩衣鎮日舞翩翩一朝忽謝北堂萱  
憔悴羅兒成骨立更依王母到鄉園幽閨寂莫思沉沉  
病魔詩債如相尋帶水能通武林棹漁人常入桃源深  
玉釵忍負生前約百感從茲碎此心固知君家日凋敗

好家居被織兒壞蕭蕭四壁甌生塵琴書不抵門前債  
雖然不共渴與飢背人起卧時長喟還幸郎君好讀書  
人道姿容侔衛玠霄漢飛騰翻掌閒我聞斯言愁少解  
花開花落對閒窻荏苒標梅期已屆黃姑催嫁駐河梁  
却向天臺訪阮郎寶帳香濃花斂霧雲屏春暖燭生光  
雙飛未幾治行李忽忽送君遊帝鄉葡萄美酒酌玉盃  
勸君飲醉衝風霜慷慨送行強忍淚中腸沉痛如沸湯  
仙桂何曾在平地達人那顧怯空房人生豈願離別苦  
風雨恐被朱顏誤寧知天不祚衰門李廣難封緣定數  
當時捷徑是終南今日終南成大路三戰何期三敗北

薄言唯有呼天訴日月尙且有盈虧草木猶能霑雨露  
我得何罪竟沉淪想因識字天還嗔龍馬能行常汗血  
翡翠因羽遭殺身古言養子願愚魯聰明自來慣誤人  
父兮父兮詎知兒支離憔悴非當時別多見少不足論  
老大無成洵可悲杜郎欲歸須近夜年年被放脩蛾眉  
更欲掌刀剖我腹何事寧馨多不育三摘空憐抱蔓歸  
枕邊不盡吞聲哭寒燈影裏更思鄉扶牀姪已就家塾  
天涯骨肉悵離羣比聞阿弟冠南軍先我著鞭誇祖述  
憐渠下第比劉蕡彼蒼何得太厚薄同氣倏爾雲泥分  
百舌告天天不語愁對長空月如水觸寒征雁向天南

肯將書寄庭闈否蠻方謫守已經年欲識慈顏從夢裏  
嗟嗟我身若雞肋不是無家歸不得昂昂昔日歸故鄉  
踽踽今難轉舊域暫與羅含借宅居姓名不願人前識  
打窗寒葉驚獨眠燈前形影相周旋曉角聲聲隨落月  
暮林處處帶踈煙醉後揮毫思草聖靜中繡佛想逃禪  
閒尋舊恨眉峯蹙歌成一字愁千斛迴黃倒綠難預猜  
失馬寧知非是福丈夫變化會有時寒威退盡陽回谷  
尊前有酒且盡歡世事從來徒碌碌

照影曲

春波壓壓春衫輕對花比妾還邀卿風簾水檻時依約  
芙蓉下上玻璃明玻璃明與鏡光似靈剪雙環眸剪水  
珊珊相對靜忘言軟紅塵裏無纖滓

對雪

飄瞥渾無際迷濛半日餘光凝千樹曉色映一窻虛榭  
葉吹村釀梅花淡草廬謝庭清思發何必灞橋驢

春日有感

戲蝶憨鶯異樣狂本來無賴是韶光春苔過雨青青破  
社鼓聯街燕燕忙傲世誰能如北阮傷春自古怕東皇  
送人作郡渾閒事鬼縱揶揄亦未妨

遠眺

日落岸逾濶江清望轉賒亂山紅紫艷錯認故園花

外君有寄次韻

四海丈夫志離情敢怨傷秋風憐瘦骨羅袂濕成行

半江主人原唱無限相思字臨封神暗傷重憑飛燕寄三五恰成行

擬瑤瑟怨次外君韻

殘粧半卸怯輕寒漫剔銀燈刺彩鸞恹煞侍兒都睡去

獨留明月照闌干

半江主人原倡冰簟悽清不耐寒閒尋繡譜畫雙鸞回身鏡影仍驚隻惹起新愁又若干

朱氏

名宗淑字德音號翠娟江蘇長洲縣人朱雲驤

女著有修竹廬吟稿德音近艸

任兆麟修竹廬詩稿序翠娟朱媛清溪子表甥女也幼承尊甫衡帆先生之教好歌詩出入唐宋間今春以近稿相質風格道上烈婦行一篇直造古人堂奧矣清溪錄其尤者若干首列女士編中攷漢時女子能傳父業者有濟南伏氏扶風班氏陳留蔡氏然伏班不聞有詩名蔡則詩歌外不聞他有著述洵乎兼才之難也衡帆以詩名吳下久邇年覃心經術嘗與余論易卦極精覈可謂當世經師矣余願翠娟進詩而譚經則又兼前人所不能兼者人第知衡帆有女而余獨幸翠娟有父也爰題數語于卷首并質衡帆

登靈巖

搢策上高峯峯峯濕烟靄山勢空嗟峨繁華竟何在坐久寂無人飛鳥白雲外

烈婦行

嘉定鄭烈婦朱氏事姑孝謹繼因小姑構讒同夫出居于外食貧居賤艱苦備嘗未幾夫喪以栢舟自矢攜其子歸子又殤遂無意人世不食而死余聞而哀之作烈婦行

妾命薄兮奈何託君子兮絲蘿洗手作羹兮事姑姑色  
不喜兮婦心獨苦回問小姑兮姑意云何哀哀逐子中  
心孔憂維妾之故罹此譴尤嗟哉徒有子婦欲侍堂上  
靡由庭前樹一朝枯秋風急啼棲烏君一去兮妾身孤  
忍死兮爲此呱呱天降禍兮孰知其端巢既覆兮卵不  
完靜言思之摧心肝妾不能事姑又不能撫子偷生何  
爲餓死相從地下耳白雲悠悠清泉泚泚妾心苦兮誰

知妾命薄兮如此

聽鶯曲用韋左司韻

輕烟不散雲冥冥雙柑攜酒殊堪聽流鶯往往如梭織  
柳色初青憶鳳城出谷欣值新晴候和鳴早得春風情  
一聲兩聲花外嬌絮語丁寧舌漸調深黃數點誰能及  
韻入簫韶不虞澁上林紅樹映朝暎嚶嚶清圓息衆喧  
此時金衣露猶濕絕勝樵熟來田園獨不見繫絲孤燕  
聲偏促紛紛百舌啼新綠何似如簧鳴林間砭針俗耳  
清且閒百轉枝頭尙未了重陰不放游絲裊捲簾香霧  
襲人衣彷彿蘇堤正春曉

月夜聞笛懷清溪夫人

天寒露重不勝情  
遙夜披衣坐月明  
何處樓中還弄笛  
落梅如雪滿江城

詠蘭

空谷無言亦自芳  
笑他桃李媚春陽  
初來詎羨騷人佩  
好補南陔第一章

春日

近水桃花爛漫紅  
堤邊楊柳舞春風  
欲知二月韶光好  
只在鶯聲細雨中

孔昭蕙

字樹香浙江桐鄉縣人適諸生朱萬均

夏日自遣

涼風不可得炎日燥  
簾帷雙燕窺繡戶  
一蟬鳴高枝欹  
枕北窗卧閒吟消夏詩  
此時農家婦二蠶方成絲  
繅絲猶未畢攜飯田間馳  
畏日苦難避流汗凝膚肌  
愧我深閨內晏息猶云疲

思親

落日晩生寒無聊倚畫欄  
白雲天外渺明月座中看對  
酒愁難遣思親淚未乾  
寸心還自慰賴有妹承歡

黃鶯

雅擅芳名到處揚清音婉轉日初長遷於喬木陰陰碧  
點入垂楊裊裊黃繡戶曉來驚遠夢璫窗靜裡助詩腸  
交交織就三春景遍引遊人醉羽觴

秋夜懷月波沈表妹

轉瞬秋光又一年紅蓮落盡桂華鮮離心欲寄天邊月  
常照佳人玉鏡前

程雲

字友鶴號梅衫安徽歙縣人汪文琛之室也著  
有綠窻遺稿

吳珏古歙詩存程雲字友鶴號梅衫汪文琛室  
有綠窻遺稿其五言如猛雨聲歸樹輕波綠到

田寫景甚工簾捲月  
斜來有六朝風味

小寒食前一日春園小集分韻

冷雨愁無歇今方見好春梅花香已老楊柳色初新水  
際啣泥燕橋邊覓句人來朝小寒食煙火斷比隣

晚秋

漏靜難成寐惟聞蛩語催窻開風悄入簾捲月斜來夜  
色渾如水秋心絕點埃行吟清露下不盡意徘徊

偶作

夢到幾時覺愁從何處來推窻見花影明月滿空階

春柳



連宵微雨潤柔條濃淡春煙縷縷飄青影乍垂芳草路  
流鶯啼過小平橋

暮春寫呈鵬妹

綠柳陰籠白碧桃賣餉聲比賣花高年年好景多如此  
偏覺春深感二毛

顧韞玉

字絳霞江蘇崑山縣人翰林院待詔顧芥亭女

適彭主政希涑著有芸暉閣吟草

顧芥亭芸暉閣吟草序畧吾女甫羈端重若成人八齡就傅塾師為歲進士朱子靜先生尤鑒賞之晨起課書畢即令熟習唐人法七十二筆月餘盡得其秘結字道整酷肖其師迨蓄髮專

習女紅暇即靜坐時或手一編余弗問也余嘗誦白傅琵琶行長恨歌等篇數過他日女記憶不遺一字余曰汝未嘗誦何以有此則曰吾耳熟焉故也久之余偶與同人唱和戲謂曰汝能學吟否但見其端坐凝神之狀後賦物寫懷有觸輒成咏自十齡失恃時時掩泣既長有憶母詩猶聲淚俱下及于歸隴西吟咏絕少意在職中饋以相夫子讀書成名雅不欲以此見長角勝也易曰婦道無成詩曰無非無儀彼知事姑孝謹相夫敬禮而已嗚呼於其不以才顯余不得嘉其德矣丁未春蘭臺甥赴公車女歸寧初猶以歡聚加餐閱月病劇容貌整飭如常度父女相依纔六十日竟爾永訣無問遠邇聞之驚歎悼惜蘭臺哀其遺稿付梓聊叙顛末以誌慰之耶誠痛之也彭希涑亡妻顧孺人傳畧孺人姓顧氏名韞玉字絳霞芥亭公女舉止莊重無脂粉習氣訥然不自見其才丁未予自都應試歸而孺人已於三月二十日卒從予者凡八年孺人世為崑山

望族外舅耽文章工書法孺人年十二失恃爲  
外舅所鍾愛每導以筆墨之事若夙習者然臨  
池摹寫取法歐陽又喜吟詩粧臺側時手一編  
也二十一歲歸予事吾母至謹予性耽書籍孺  
人日執卷助予咿哦斐几長榻圖史縱橫每欲  
檢某事則孺人先已取某書噫予呈予前以故  
甚覺讀書樂也每謂余言吾不願富貴但得靜  
室幾間香一爐水一盃枯坐其中勿聞戶外事  
足矣嗚呼以孺人聰慧過人性情肫至彌留時  
亟亟以治心爲務去來之際不味前因宜可以  
無憾然予之悲孺人者卒無以解也

### 登虞山作

迤邐琴川春色好海虞山翠堆襟抱幾折嶙峋入杳冥  
石屏千仞神工巧我欲摳衣攀絕巔天風朗朗鳴流泉  
幽崖盡處開圖畫波流淼渺山娟娟平楚煙蒼縱遐矚  
全吳掉尾海門束覽盡東南岩谷奇蕩心眙目茲山獨  
我來不爲踏青游靈踪勝迹憑冥搜巫咸不作虞仲去  
青山千載雲悠悠

### 風雨中望孤舟

征帆風雨際渺忽一鳧趨濕霧迷山翠迴波響渚蒲遠  
踪隨鳥盡孤影與雲俱莫訝舟行險風濤何處無

### 小春詠菊

籬邊佳種晚烟籠傲骨稜稜小圃東風送寒香侵座榻  
月移清影入簾櫳駐將秋色烟霞外謝卻時粧錦綉中  
珍重霜壇留笑口自君開後百花空

秋日游玉峯

羃歷秋旻氣象清翠微爽色望中生潮迴山郭孤峯迥  
雨洗人烟一塔明好泛扁舟移夕照每臨古蹟動遙情  
籃輿幾度穿林麓寂寞祠堂落葉橫

題畫

古屋依寒林遙村隔深塢客從板橋來衣帶前山雨

四時佳景詩

滿目紅英似錦一溪弱柳如烟香暖佳人羅袖花陰深  
處秋千

水閣晚涼初霽荷香入座生風雲外輕雷漸遠一鉤新

月朦朧

翠袖烟含宿雨露叢風遞幽香滿地月明如水半窻竹  
影搖涼

嶺上寒摧楓葉庭前香遞梅梢昨夜紙窻風緊朝來雪  
滿晴郊

立秋

露井梧桐昨夜飄長空極望碧雲遙一天秋意誰先覺  
暗換商聲葉底蛩

白燕

銀剪輕風送曉寒穿來飛絮訝春殘那知暫向林間宿

猶作枝頭霽雪看

隨園詩話彭希凍孝廉之妻顧韞玉能詩早卒咏白燕云云

袁杰

字 [redacted] 浙江仁和縣人袁明府枚之堂妹也

奉和簡齋大兄見貽原韵

地隔鄉關夢鮮通忽來詩訊自南中宦遊結宅鄰江令

歸隱名墩屬謝公

江總宅謝公墩皆南都勝迹

舊約未忘聯舍月新

吟頻憶對床風只應歲晚相依樂剩許追陪玉局翁

吳惠姬

安徽歙縣人吳太史以鎮之女適錢袖海

句

白雲紅葉青山裏雙隱人間讀道書

隨園詩話吳涵齋太史女惠姬善琴工詩嫁錢公子東字袖海伉儷甚善丹青為畫探梅小照亡何錢入都應試而惠姬亡像亦遺失錢歸家想像為之終於不肖忽得之於破篋中喜不自勝遂加潢治遍求題咏且載其鴛鴦吟社箋詩稿贈夫子云後入夢云已託生吳門趙氏郎可以玉魚為聘錢因自號玉魚生賦詩云可憐女士已成塵翻使蕭郎近得名聽說祇今吳下路歌場人說玉魚生

歸懋儀

字佩環號 [redacted]

江蘇常熟縣人適上海岳州守

李心耕之子學璜著有綉餘小草

曹錫寶二餘集序畧而欲母與女之繼繼承承  
擅美閨閣者則莫若隴西李氏李氏與吾宗世  
篤姻好硯畚之大父鶴洲有隱德與先祖麓蒿  
公為莫逆交嗣柳溪種德力學不墮其緒兒女  
一堂稱極盛其長女心敬歸常熟觀察而常熟  
之女懋儀實硯畚女甥又歸其長子學璜母女  
皆嫺禮法工吟咏今所謂二餘詩集者則其母  
若女之所作也予嘗反復披覽蠹餘詩中規合  
矩情深文明尤喜其無巾幗氣惜早世所傳篇  
什無多至若秀餘則天才超越加以沈酣六義  
藉非稟山川清淑之氣而又迺之以前光澤之  
以墳此硯畚憫其姊之不一而足又樂其子婦  
之克繼厥美彙而梓之以貽嘉話  
於藝林垂家範於奕禩誰曰不宜

鶴飛來

維海湯湯三山居其中開足以立貝闕而珠宮仙人翱  
且遊其樂不可窮誰其從之二八白鶴往來西復東

解一

山之高矣有石斯崧鶴之潔矣有羽斯豐引吭乎皎月  
而振翼乎清風醴泉芝草供飲啄倏不知春夏與秋冬

二鶴之鳴矣徹於九重鶴之止矣閒世一逢銜來丹棗

之實大與安期同得而食之壽偕天地無時終

三解

五人暮

千古人心終不死吳中義激五男子貂氛肆燄朝野昏  
翻手勢欲傾乾坤印纍綬若不知數鞠躬俯首聲復吞  
平居持議徒雄壯袖手委蛇熟奮往翻將文墨飾好貪  
捫心內愧曾無狀五人生不讀詩書位不列簪裾但以  
善惡為毀譽當其攘臂共赴難義勇直欲凌鯨諸嗚呼

名敗身殃餘賄賂穹碑峻宇等朝露松柏青青耐歲寒  
冶遊人奠山塘路

夜起

不效劉琨舞聞雞乍起時月移花外影句續夢中詩香  
燼金猊冷風清玉漏遲宵深憐袖薄蘭露濕堦墀

白菊

烟霞咲傲幾重陽逸態偏宜淺淡妝不藉鉛華標晚節  
肯將顏色媚秋光月明老圃枝逾瘦霜厭疎籬葉未黃  
恰稱素心人送酒陶家三逕好傾觴

春院

閒庭晝暖日偏長小立東風撒繡床空際遊絲兼絮舞  
堦前瑤草競蘭芳流鶯隱樹窺疎檻粉蝶隨人繞曲廊  
信步不嫌花逕滑一篙新綠漲池塘

柳

蜜葉籠堤暗長條着水輕春風一披拂無限玉關情  
織月破輕烟枝頭鳥語妍灞橋歸路晚別思總堪憐

暮秋憶諸弟妹

城角秋笳起暮愁一天涼月照南樓西風雁影人千里  
黃菊清尊又晚秋

擷芳集卷之五十四目錄

才媛詩

古歛訥菴汪啟淑選

葛氏句

方芳佩十四首

金綺一首

曹若木一首

吳端一首

陳素安五首

劉素一首

駱思慧二首

李汝瑛一首

黃卣一首

陳淑姜一首

張塤一首

廖淑籌九首

江順一首

顧冰心一首

沈氏二首

毛萼華一首

蘓蘭仙一首

席氏十首

孫雲鳳四首

孫雲鶴二首

擷芳集卷之五十四

古歙詔菴汪啟淑選

葛氏

江蘇崑山縣人龔煒之母也

巢林筆談先夫人雅好文史每于不孝等昏定時講論疊疊嘗謂漢昭烈雖未一統賢於高祖孫仲謀稱臣於魏有愧父兄司馬懿陰賊更深於操又言大美終之實難唐文皇為世英主猶有十漸之累天寶昏憤不足論矣又稱開國母后莫不賢明獨呂雉以妒悍稱制外戚之禍漢為最烈貽謀可不慎歟如斯正議雖儒者無以異也歲月如流慈訓久邈每讀史傳輒為涕零

句

塵世多般無了日到頭畢竟望西遊



巢林筆談先妣葛孺人虔奉佛氏乙巳之春偶不  
擇作淨土詩以自廣有句云云明年春遂棄不孝  
等嗚呼此其為泰  
山梁木之兆歟

方芳佩

字芷齋又字懷蓼號鳳池浙江錢塘縣人滌山

方宜照女編修杭世駿之高弟也適家方伯新

著有在璞堂稿

沈業師德潛在璞堂稔序往予過維揚謁淑則  
許太夫人夫人故錢塘人博學多聞尤長吟咏  
顧常道其鄉閩秀方芷齋不置余已心識之及  
老友翁霽堂徵君自武林來出芷齋在璞堂稿  
見示則許太君之序言在焉觀其詩留連景物  
清而不靡如水仙一囊湘梅半萼嫣然薄冰殘  
雪之外於是嘆芷齋之能詩為不可及而許太  
夫人之推獎為不虛也芷齋居西冷六橋三竺

映帶左右皆足以助詩境有蕭閒清曠之懷以  
抒寫之而又詩筒往來得許太夫人切磋之益  
因以力追風雅一掃綺麗謝道韞  
所謂穆如清風者芷齋其庶幾焉  
方德發在璞堂吟稿跋畧余於乙卯歲為姪輩  
延師令兩姪女暨小女同學獨小女與書卷有  
緣性喜涉獵戊午秋遷居東城老友胡且安經  
師也館課之餘邀至書齋為之講解四書課誦  
詩禮庚申春黃筠村表弟來舍傳寫先代遺像  
始教以臨帖作詩甫半年謝去是時翁霽堂徵  
君在中丞幕府屢蒙枉顧獎掖殷然童年益覺  
鼓舞癸亥夏移家鳳山之麓杭堇浦太史挈眷  
同居素托通門辱收子之麓杭堇浦太史挈眷  
遷喬戊辰歲鹿田朱太守自蘇門歸以戚誼招  
致門墻時相過從憐其體弱戒以勿多用心余  
素不工詩兼之筆耕遠出不遑督課又婦道首  
重女紅餘力方一握管淥淨許太夫人負海內  
鉅望已巳春藉友人寄呈一冊蒙賜弁言遂稍  
出以就正有道詎可災梨問世哉顧徵君獨切  
嗜痴之愛間歲必買掉惠臨厚加期許諄切懇

至久而愈殷攜稿吳門捐貲付梓係王鳳喈孝廉選定未暇校讐尚有遺漏業經刷送無從增補矣爰備述顛末便覽者知小女有志向學余則無力栽培根底未厚吟稿原不足存而徵君

一片嘘植盛心始終罔替豈惟愚父女承矢勿謏即聞者亦應志感耳古檀詩話瑤林秀樹毛太史稱其女弟子徐昭華詩者今武林汪給諫夫方芷齋芳佩著在

樓題春筵聽雨圖云潮迴兩岸白烟歛萬山青山居云開分鳥跡尋花徑曲引泉流灌藥苗移居云新分修竹堪聽雨舊種蒼松不記年西湖山房云連空靄雲飛近人到忘機鳥語

親尚遇西河太史亦當以瑤林秀樹目之王鳴盛題方芷齋在璞堂吟稿詩掃眉不櫛有誰如香茗春椒灑翰初試仿簪花裁妙句寸縑堪敵百碑磔西子湖頭面面山書牀鏡檻鎮

長閒最憐吟思清如許翠袖天寒修竹間金志章題在璞堂稿詩妙詠真堪儷玉臺左家嬌女擅清才綠牕晝靜閒吟罷喚取珊瑚架筆

雨中看山

來五色胸中具錦機抽思軋軋妙通微任渠香茗誇才調不數當年鮑令暉粉膩脂香浣盡空天然秀色少人同他時寫入然脂集應遣蕉園拜下風孫謙題在璞堂稿詩左艷班香絕代殊鳳皇山下卜幽居寫來新樣簪花後織就迴文賦雪餘

連朝掩扉臥襟懷殊怏怏重陰晝亦昏遠色潤書幌忽聞山雨飛簷溜送清響開簾得奇觀林木何蒼莽豈徒

眼界新足使神情爽擁鼻一微吟揮毫技復癢橫斜字半欹聊以誌幽賞絕愛羣鴉雛衝烟自來往

杭世駿太史和詩窮陰洩寒雨枯坐轉鬱快誰調邱中琴竟掩烟際幌接檐兩高松作意逗清響山

形既朦朧風勢更蒼莽  
一披謝女詩快若抓背癢  
看山復聽雨永此茅屋  
賞明將理青鞋  
因汝遂孤往

### 西湖打魚歌

明湖浩渺萬頃秋  
荻花紅蓼紫汀洲  
朝霞散彩旭日上  
鳴榔棹出千漁舟  
招呼齊起布巨網  
迴旋水面風颼颼  
錦鱗潑刺駭欲遁  
亂拋玉尺驚眠鷗  
漁人生小江湖慣  
拍天翠浪相沉浮  
長笛一聲烟際起  
笑歌歸去笭箬收  
雲峯不動卧寒碧  
浴鳧飛鷺還悠悠

### 初夏書事

日永無塵事  
山居境轉幽  
雨歸雲外樹  
人語竹間樓  
春去寒仍淺  
花殘蝶解愁  
晚牕茶未熟  
一縷翠烟浮

### 立秋前一日

轉瞬流光速  
臨風易作愁  
芙蓉蕖還暎  
水蟋蟀已鳴  
秋愛靜居山境  
迎涼上小樓  
井梧如解事  
爲我少遲留

### 寄懷淥淨太夫人

久奉南豐一瓣香  
獨憐弱質未升堂  
姓名早入殷淳集  
著述羣推徐淑章  
老去清標儕竹柏  
閨中令望重珩璜  
絳幃終擬從韋母  
先托雙魚達八行

閨秀徐德音和芷齋寄懷原韻蕉園舊社重凝香  
作手今推在璞堂清氣應知餐沆瀣雅音還想曼  
琳瑯蒼葭白露人千里楚水吳山天一  
方欲驗神交相憶處鏡中吟鬢盡凝霜

春興

幽居恰喜近山城樂意相關境轉清  
雙蝶踟躕林外去一鶯睨睨樹間鳴  
盧醫不療烟霞疾高士還深邱壑情  
精舍日長閒不得苔錢數遍遶階行

僻處城南一草堂高情自愛水雲鄉  
臨池每困生花筆得句旋投古錦囊  
山送晴暉來畫閣樹分濃翠覆吟房  
凭闌莫訝韶光淺春事遲回到海棠

菊枕

頗愛山林事事幽擷來黃菊一囊收  
空齋香滿憐高卧冷夢花深作晚秋  
身世不期成逸客人間且莫笑方頭

醉中往往魂疑蝶只記東籬見舊遊

閱書有作

一年彈指又經秋雲物淒涼歲月遒  
自昔佳人皆有恨由來名士盡工愁  
班姬失寵難成賦趙嘏無聊但倚樓  
莫向殘編動惆悵可知容易白人頭

山居

市遠山深興自饒數椽聊得避塵囂  
閒分鳥跡尋花徑曲引泉流灌藥苗  
戶外何知有雞犬閨中亦復樂簞瓢  
幽牕喜與秋江近欹枕長聽上下潮

次答筠圃夫人寄懷原韻

掛支集 卷五十四 五  
本欲乘閒問起居病魔紛擾未全除荷憐弱質耽書卷  
特草新吟託鯉魚夜月懷人勞輾轉秋風伏枕更躊躇  
開緘忽誦蒹葭咏良會雖疎意有餘

閨秀杭澄聞芷齋抱恙旋喜勿藥過後方知不得  
走使起居念而且愧詩以謝之伏枕寒牕歎索居  
年來世事久蠲除寸心不盡傳雲樹尺素難教覓  
鯉魚舊雨時時徒夢寐新愁渺渺轉躊躇聞君感  
疾知方晚問訊  
頻疎愧有餘

西湖雪

湖水莽無痕雲峰失故態猗與苧蘿女遽爾施粉黛

初春卽事

淨几明牕淡欲仙落梅風細裊茶烟徘徊更愛梨花月

料峭春寒人未眠

秋夜

繡枕垂雲夢乍醒侍兒愁睡觸銀屏寒欲問更深淺  
露濕紅衫月半庭

金綺

字宛霞號霞軒江蘇吳縣人翰林院待詔揆方  
之女顧中翰宗泰配也著有香樓詩

月滿樓書懷外韻

銀蟾初上映層樓錦字書勞寄遠愁花影團來偏作障  
簾波漾去不勝鉤清輝却望長安道香夢還憐江國秋

何日刀頭歸棹穩芙蓉溪上伴閒鷗

曹若木

浙江秀水縣人

夏柳次韻

暑雨初消裊翠絲納涼亭畔引詩思分開青障吟鞭度  
印出紅霞夕騎馳一曲笛聲人靜後兩堤蟬噪月來時  
寫生更有邊鸞手為畫風流夏日姿

吳端

字令儀安徽歙縣人吳達菴孫女適全邑曹學  
詩別駕乃孫曹枚嫁僅踰歲即卒詩稿惜散失

送春步韻

難留二十四番風不信三春夢是空依舊明年花信至  
牕前仍見滿園紅

陳素安

字定林浙江仁和縣人掌科陳鴻寶之女弟適  
錢塘沈觀察世燾四十一歲即卒著有生秋閣

吟稿

沈觀察世燾繼室陳恭人傳略陳氏名素安字  
定林歸余為繼室余以喪元配周恭人而所遺  
子幼聞陳女柔順知書嘗刳股以療父疾遂納  
禽焉陳氏之生外舅暨外姑潘太恭人鍾愛之  
授以女訓毛詩然秉慧而多疾坐臥一小樓不  
下樓者十年鍼紉之暇輒事吟詠珍諸篋笥諸

兄彊索之已積帙矣蓋風雅之性固由靜壹而  
 深亦其夙成者歟星垣先生既沒從其兄寶所  
 給事奉母京師會余官西曹請婚潘太恭人許  
 之結禱以後每念舅姑未迎養我子在南不得  
 主中饋以操井臼唏噓仰嘆益幽憂不能偕歸  
 寅遭先大夫喪望南哀涕舊疾頓作不能偕歸  
 留邸三年依其慈母則思我母迫其先父則哭  
 我父見其兄嫂之子女而自傷未有所生則冀  
 我子之一見也由是復奄卧牀蓐不可起矣王  
 辰冬服闋補官奉我母太恭人攜我子至京師  
 喜且泣日吾得見姑及子更無所恨雖然吾不  
 能久侍姑若我子何又日吾容狀若此不且傷  
 姑之心耶太恭人憫之甚時以骨肉完聚為之  
 慰夏秋間脾泄藥罔効竟卒年四十有一乾隆  
 三十六年以  
 聖母皇太后萬壽覃恩得封恭人有生秋閣小  
 稿二卷  
 詞一卷  
 沈太守清任生秋閣吟稿序略余弟杏雨觀察  
 之繼室陳恭人余同年友寶所給諫之女弟也

寶所兄弟姊妹無不能詩一時唱和有謝庭內  
 集之雅恭人適杏雨年已三十餘抱數載宿痾  
 猶勤供婦職不少懈甫七年而卒其詩蘊藉深  
 厚卓然成家惟其為不櫛諸生故所著止此人  
 皆以恭人抱病結禱未數載而早逝為憾余獨  
 謂恭人得坤貞之道有黃裳元吉之象焉故爰  
 佩之榮旣享於生前而藻翰之光又垂於不朽  
 以視夫山人之瓢居士之屨若滅若沒於天地  
 間者其榮辱得失為何如若必以蘭摧玉折  
 之傷為恭人致慨也其猶未離乎目論者矣  
 陳掌科鴻寶書亡妹素安生秋閣遺稿後詩生  
 秋一卷對寒燈落葉哀鴻感不勝謝女樓頭飛  
 絮盡琉璃硯匣夜凝冰深閨弱歲已耽書花竹  
 娟娟映綺疏一自工文兼善病人間真有女相  
 如猶記褰幃問字頻一編相伴慰慈親須知風  
 慧由天性說到門庭語最真春椒香茗費才華  
 環珮音沉歲月餘一度看詩一悽惋阿兄頭白  
 眼昏花郎伯專城氣象恢書來腸共錦文迴俸  
 錢不用營齋奠為  
 刻遺詩告夜臺

與嫂別後經旬頗無意緒賦寄此章卽用自遣  
惜別河橋秋秋雨離人淚解纜且北行欲挽苦無自君  
去重踟躕我居徒慘悴曉起書橫牀夜吟燈吐穗牕前  
舞風葉撼撼半已墜草間泣露蟲啾啾竟何爲感此坐  
長歎不飲渾似醉臥病幾寒暄川途知險易孤帆正汝  
愁二豎偏吾累惟幸白髮人健飯天所賜凝睇望長安  
好達平安字

食笋

南山雷動急雨飛林中戢戢龍孫肥曉來和露劚紫泥  
錦綉脫出脂凝肌銀刀乍截白玉版漫與禪老叅圓機  
朱門梁肉頗厭俗非君秀色難療饑逢春善病兼中酒  
堆盤大嚼其庶幾

小園

小園秋欲盡寂寂掩柴扉瘦竹雙禽語疎花一蝶飛雲  
晴敞虛閣水碧護苔磯愛此清幽境長吟送落暉

旅夜書感

衡門底事失棲遲却向天涯借一枝繡戶已無人獨臥  
寒燈欲照夢何之惟應月落烏啼處常憶梁空燕去時  
封就離家千點淚倩他雙鯉爲傳知

秋日酬寶所家兄湖上之作



湖上題詩記昔遊十年孤負野橋秋何時共喚扁舟去  
問訊沙邊舊白鷗

劉素

里次未詳

詠白鸚鵡

怪來雲一片飛過隴頭春夙慧疑才子前身豈美人自  
矜黃裏貴寧如綠衣新任爾山雞笑平生不染塵

駱思慧

浙江會稽縣人本姓馮父坦母卽胡慎容幼撫  
于母姨胡慎儀遂從駱姓髫齡負才名適洪洞

劉少宰秉恬

秋山瀑布

劈破高峯最上頭玉龍直下隱潭湫橫空百丈銀河瀉  
掛壁千尋素練浮濺雪噴雲楓葉冷穿厓度壑翠巒秋  
誰來濯足飛泉裡洗盡紅塵一泳游

雁來賓

征雁相呼度畫樓叫雲音咽楚江秋影沉寒渚他鄉夢  
聲斷衡陽故國愁接翅真憐兄弟苦書空不作稻梁謀  
弋人那識青冥濶爭看沙痕爪印留

李汝瑛

直隸任邱縣人工部虞衡司員外李中理之孫  
女也適湖南鹽驛道紀淑曾之子琛著有金剛  
經注及詩鈔

題釣臺

臺尚高高在江仍浩浩流巖光好男子志不願封侯

黃 卣

浙江 縣人

愁

一字至七字體

愁旅館重樓閒處惹冷相勾曲傳心孔重壓眉頭鶻啼  
黃葉雨鈴語白楊秋篳篥軍中按拍琵琶江上停舟金

叙暗卜人千里玉杵敲殘月半鈎

陳淑姜

詩見谷音傳響

次韻題明妃圖

和親逐北恨紛稠馬上哀絃泣素秋怨魄化爲原上草  
至今青塚在邊頭

張 埏

字素書浙江桐鄉縣人

夏柳次韻

長條觸熱舞輕絲春去還榮舊日思上苑影濃鶯罷織

章臺花落馬空馳  
熏風低拂魂消處  
涼雨橫拖夢醒時  
好句依依堪覆咏  
妍詞豈是逞丰姿

廖淑籌

字壽竹福建侯官縣人工詩畫適儀部郎許均

著有琅玕集

福州府志廖氏名淑籌長洲尹許遇之子婦禮部郎均妻氏婉嫺天成人事舅至孝羞膳不假手庖人宵衣煑爨門屏間者恒二十餘年舅宦陳留官署災先擁護小郎姑而後及其子舅卒從夫宦京師夫奉使雜揚脫簪珥以資行李夫卒於官同仕有所贈婉却之歸家貧困幾於無以自存淑籌工詞翰間寫花竹皆極精緻陳榕門相國以為不減管道昇趙文淑風味著自琅玕集

十硯軒隨筆吾閩閩秀多能詩更有結社聯吟者若廖氏淑籌鄭氏徽柔莊氏九畹鄭氏翰尊許氏德瑗及余女淑窈淑晚皆戚屬復衡字相比每讌集各拈韻刻燭或遣小婢送詩筒無不立酬者士女樹壇坵亦一時韻事也廖為余中表許考功雪邨婦字壽竹兼工繪事鄭為明府石幢太府荔鄉姊余之表姊字靜軒少寡今年九十月莊九畹字蘭齋余妻族女許字廣文吳景翊子未嫁而守貞翰尊字秋羹石幢女山陰明府林培根妻德瑗字素心州牧石泉女適何氏亦少寡無子與莊皆以節著余女淑窈字姒洲適游婿諸生藝淑晚字劒佩適林婿春起硯史端溪璞玉夜珠色探向驪龍領下得吳趨孀女女媧手煉石如泥工剪刻蚌形琢出月初圓秋水澄江練一幅案傍亦有玉蟾蜍對此垂涎敢吞蝕鏤肝刻腎玉川子箋奏天公枉費墨何如研露寫烏絲翠袖佳人勤拂拭壬寅九月九日雪邨居士題余與雪邨同館閣者三年內子廖則來齋舅氏女也詩翰繪事色色精工魏國仲姬未多讓也雍正丙午臘月大雪予過訪

雪邨圍爐擁酒掃梅花大幅雪邨發翰表姊氏  
 園花筆墨清潤極闈房之韻事詩所云滴露烏  
 絲翠袖拂拭子皆目覩其事茲歲薄宦京師故  
 人長謝回首曩年文酒縱談月斜燈地時有如  
 隔世已未九月二日與涪雲五弟夜坐守  
 餅齋談都門舊事展册題記古梅謝道承  
 吉侍讀夢熊琅玕集序閩中閨閣能詩者如謝  
 景山之母暨其女弟陳述古之女黃銖之母並  
 皆賦性幽貞吐辭清雅為當世大賢所重至於  
 春笋秋波之什梨花繡戶之詩才之鍾於情者  
 不可勝數若宋比玉之傳徐氏黃氏方孟式集  
 序於鄭氏吳氏名媛接迹亦風雅所漸習俗使  
 然也歲丁酉夏侯官許生作霖來謁出其祖母  
 廖夫人琅玕集請為其序許生予所選拔士夫  
 人為儀曹郎許雪邨之配本林來齋女繼廖氏  
 者來齋好古名蹟作金石考又拓昭陵碑石文  
 字巋然成集夫人胚胎前光所為詩其志和以  
 莊其音亮而婉予最愛其課許生兄弟讀書詩  
 清時絃誦重廉吏子孫難之句竊謂清白傳家  
 一經垂教此二語括之殆盡許生勉乎哉夫人

寫歲寒圖壽黃十硯表兄八十重宴並紀以詩

工詩又工畫其寫花竹則相國陳文恭以為不  
 減管道昇趙文淑風味見於郡志其與月鹿夫  
 人張季琬合畫則中丞潘敏惠以為冷香寒翠  
 冶南雙璧書之於册夫人手蹟為名賢激賞如  
 此而况於詩乎夫人之詩情文相生止於禮義  
 當與謝家母女陳黃諸淑媛並傳於後無疑也

可無此君千尋挺晴昊人生重歲寒靡靡安足道卓哉  
 十硯翁辭源波浩浩雄幟樹騷壇功名亦已早宮允舊  
 家聲直接蘊文藻憶昔先夫子外家聯夙好明月暗揚  
 州怒然竟如擣翁時領綏江浮雲急煩惱一官等鴻毛  
 道德自濯澡非不歷艱辛興趣無潦倒君子固貞窮穆

穆舒懷抱夫人謝家風兒女繼香草

公著有香陶潛五草齋詩話

柳君白傅香山老皂蓋日式廬宛必瞻三島惟翁慎丰裁亦不嫌紵縞巍巍元禮門容膝皆俊造今年重宴期蟾宮又再到更喜大耋齡康寧長壽考囑我繪斯圖不受霜雪槁百年日期頤爲君善頌禱

黃十硯表兄八十重宴詩以賀之

人生所難在早達悠悠莫就題名席人生所難享大名寂寂誰是文章伯早達大名遠近傳簪花又上皚皚白卓哉黃翁富文藻弱冠才名已膾炙維時射策棘闈中便向冲天舉健翮英年文采足照耀從此聲華彌藉藉

中年領綬出綬江三載賢勞簿書役維翁不喜爲折腰高懷遠媿陶彭澤一官棄擲輕鴻毛翠羽明璫咸擯斥宦橐蕭蕭清若秋歸舟惟載端溪石歸來閉戶自夷猶風致依然舊裙屐有時縱飲發高譎如鶴一聲松千尺維翁磊落得天真怡養冲和若壯昔盤中甲子相轉環六十星霜似駒隙回首蟾宮紀舊游秋風兩度重來客領袖羣英一代尊天與精神誰能獲從茲里巷有新聞爭看嘉賓舊風格

香草齋詩話乾隆壬午子年八十復膺重宴鹿鳴

盛典諸戚友及四方郵寄各贈言金薤琳瑯盈

箱積帙子愧不敢當而閨秀諸什亦有可傳者如人生云云廖恭人句也

爲素心姪孫女畫梅竹并示以詩

貧簞谷口孤山麓時有幽人日往復問渠何事故栖栖  
却爲尋梅與問竹我生癖亦愛守真作畫輒欲肖其人  
慘澹經營集腕下須求臭味出風塵素心知我匠心苦  
一幅生綃屬我補我爲含毫思悄然不寫穠華到園圃  
屏藍暈碧謝裁紅蘭牕習習生清風伴梅共竹立欄東  
冷香勁節將母同

雁字和韻

欲覓子卿信西風見幾行遙天開麗藻秋水煥文章霜  
落斜飛白沙明帶草長雲羅任揮灑不獨賦瀟湘

南旋度仙霞嶺

嶺路鄉關近危峰高接天地虛編竹補山斷借雲連客  
思驚秋至歸心趁雁先籃輿閒小憩身在翠微巔

新雁

銀床初落報秋桐塞北驚寒一使通幾字橫來湘水濶  
數行斜去楚天空江樓影過燈初暗蘆荻棲遲月正中  
仗爾年年寄消息往來珍重避長弓

畫竹示孫作屏

寫此淇園種漪漪寄興深他年徵有斐原只在虛心  
畫梅竹寄石泉三姪并示以詩

粉牆南角畫欄東送響飄香曉夜風記得三廳清似水  
玉琅玕伴玉璫瓏

秋日琅玕書屋限韻

丹楓如染接簷齊高捲疎簾一雁低幾陣好風深院過  
秋聲多在樹林西

江順

浙江秀水縣人也

夏柳次韻

無奈花殘剩碧絲拈毫索句費尋思悠揚幾惹心旌動  
宛轉還牽意馬馳賦罷暑消風好後詩成涼覺竹香時

遙知綠老難重少猶望春來發舊姿

顧冰心

詩見谷音傳響

次韻題明妃圖

漢苑回思感嘆稠雁鴻南去尚知秋邊關淚盡和戎女  
都尉何堪塞外頭

沈氏

號芳谷浙江仁和縣人

題閨秀汪連珠墨蘭

繡閣芳容不可追空餘楮上畫蘭蕤披圖省得幽閨意

怡與清芬韻正宜  
由來名淑更多才  
宛似盈盈素手栽  
妙墨還教存老眼  
可憐人已在瑤臺

毛萼華

字竹君江蘇寶山縣人海客毛思正之女適嘉定國學生王賓之

寄家書

父母分南北相逢知幾時  
碧天秋渺渺雙淚背人垂

聞蟬

雨過空林逸響清  
蕭疎碧樹寄寒聲  
何因長占高枝上

每向風前嘒嘒鳴

水曹清暇錄寶山閨秀毛萼華詩人海客之女也  
聞蟬詩云云頗有寓意

蘇蘭仙

號蓉城女史

祝某壽

白首同諧慶占稀  
一堂三世戲斑衣  
修齡不老商山皓  
壽祝長生閨苑如  
自有庭前仙鶴舞  
招來雲外彩鸞飛  
華陽德重賓盈座  
金鳳搖紅燦玉屏

席氏

名蕙文字蘭枝號耘芝江蘇吳縣人席紹元女



著有采香樓詩艸自怡集

擬謝朓晚登三山還望京邑作

客心繫天末瞻望有所思浮雲馳白日京室儼參差蒼  
烟沉暝色芳樹含華滋幽花發深蹊歸鳥喧高枝倦行  
慨以懷良會復何時懷哉正無已引領空躑躅

夜坐

古砌咽草蟲幽人愛清景空林落疎葉淡月澄秋影寂  
坐生微涼露滴芙蓉冷

橫塘曲

芙蓉露滴秋水香田田翠蓋映羅裳蘭橈畫槳泛橫塘  
風吹紅袖驚新涼徘徊花底雙鴛鴦欲采蓮子愁空房  
愁空房心悄悄目送斜陽波渺渺郎情如月不長圓妾  
貌如花不長好含情折花暗斷腸回首西風顏色老

秋思

雁唳長空迥晚來獨倚樓烟銷紅蓼岸露濕白蘋洲萬  
戶踈砧冷一堤芳艸愁關河頻極目行客最悲秋

武侯祠

森森古柏翠烟浮獨向祠堂謁武侯國定三分成鼎足  
圖荒八陣咽江流天心何事終亡漢臣節真能再造劉  
畫壁靈旗風雨黯夜深應挾鬼神遊

杜陵艸堂

萬里橋邊結伴遊，艸堂景物倍清幽。  
斜陽衰艸成荒徑，老樹寒鴉變暮秋。  
放棄半生悲患難，文章千古擅風流。  
先生遺址誰題句，憑弔頻教旅客愁。

秋日偶成

疎林落葉響颼颼，景物淒涼怯倚樓。  
明月故人千里夢，關山新雁一聲秋。  
獨憐荒徑猶開菊，自許閒情可伴鷗。  
漫道讀書生計少，居然坐擁抵封侯。

虎邱竹枝詞

畫舫珠簾競麗華，玻璃巧代碧窗紗。  
吳歛宛轉香喉滑，

小調新翻剪剪花

平波如鏡漾輕漣，正是山塘薄暮天。  
競把花籃簪茉莉，隔簾拋與買花錢。

樓臺照水影層層，隔岸波光午夜燈。  
小艇一聲歌款乃，半湖明月采紅菱。

孫雲鳳

號碧梧浙江仁和县人，觀察令宜之女也。

媚香樓歌

秦淮烟月板橋春，宿粉殘脂膩水濱。  
翠黛紅裙競粧裹，垂楊勾惹看花人。  
香君生長貌無雙，新築紅樓喚媚香。

春影亂時花弄月風簾開處燕歸梁盈盈十五春無主  
阿母偏憐小兒女弄玉雖居引鳳臺蕭郎未遇吹簫侶  
公子侯生求燕好輸金欲買紅兒笑桃花春水引漁人  
門前繫住遊仙棹奄黨織兒想納交纏頭故遣狡童招  
那知西子含顰拒更比東林結社高樓中剛耀雙星色  
無奈風波生頃刻易服悲離阿軟行重房難把臺卿匿  
天涯從此別情濃錦字書憑若箇通桐樹已曾棲彩鳳  
繡幃爭肯放遊蜂因愁久已拋歌扇教坊忽報君王選  
啼睂擁髻下粧樓從今風月憑誰管柘枝舊譜唱當筵  
部曲新翻燕子箋總爲聖情憐靦靦桃花宮扇賜簾前

天子不知征戰苦風前且擊憊花鼓附監潛傳鐵鎖開  
美人猶在瓊臺舞銀箭聲殘火尙溫君王匹馬出宮門  
西陵空自宮人泣南內誰招帝子魂最是秦淮古渡頭  
傷心無復媚香樓可憐一片清溪水猶向門前鳴邑流

隨園詩話閩秀少工七古者近惟浣青碧梧兩夫  
人耳碧梧咏李香君媚香樓云云碧梧卽孫雲鳳  
和余留  
別詩者

和簡齋夫子自輓詩

今春湖碧山縈綠問字車來傍林麓丁令才欣化鶴歸  
剡溪又悵回舟速小病先徵輓句看先生懷抱海天寬  
淵明歌與司空墓曠達千秋鼎足觀玉堂宴罷歸山早

著書萬卷傳梨棗我是門墻聽講人殘膏剩馥沾多少  
 幾番魚素逐江潮知往鶯花廿四橋春酒不曾辭酌  
 元言方且賦逍遙才人物外多遊戲自云化蝶遙傳示  
 欲為今日眼前歡預借他年身後事自有人間不朽文  
 下為河岳上卿雲即今絳帳攀轅者筆當戈揮返夕曛

和袁明府枚留別杭州 四首 選二

撲簾飛絮一春終太史歸來去又因把菊昔為三徑客  
 盟鷗今作五湖翁囊中有句皆成錦闥裏聞名未識公  
 遙憶花間揮手別片帆天外掛長風  
 未曾折柳倍留連縱得重來又隔年遠水夕陽青雀舫

新蒲春雨白鷗天三千歌管歸花縣十二因緣屬散仙

安得講筵為弟子名山隨處執吟鞭

隨園詩話杭州孫令宜觀察余世交也女公子雲  
 鳳勿聰穎八歲讀書客出對云關關雎鳩即應聲  
 日噫噫鳴雁觀察大奇之和余留  
 別杭州詩四首今錄其二云云

孫雲鶴

字蘭友號 **雲鳳** 女弟也

隨園詩話孫雲鳳有妹蘭友名雲鶴亦才女也  
 咏指甲作沁園春云雲母裁成春冰碾就裏任  
 蔥尖憶綠窗人靜蘭湯悄試銀屏風細絳蠟輕  
 彈愛染仙葩偶調香粉點上些兒玳瑁班支頤  
 久有一痕鈎影斜映腮間摘花香露微粘剖繡  
 綿雙虹掛月邊把霓裳暗拍代他象板藕絲自  
 雪指個連環未斷先愁將修更惜女伴燈  
 前比並看消魂處向紫荊花上故逞纖纖

湖樓送別

才向西湖來又別西湖去置酒湖上樓搜索闔中句遂  
令負笈人也逐吹竽數極目渺綠波持杯對春樹冥冥  
暮雨時青芳草路掉首歸倉山扁舟入煙霧

輓高氏女

由來情種是情癡匪石堅心兩不移倘使化魚應比目  
就令成樹也連枝紅綃已結千秋恨青史難教後代知  
賴有神君解憐惜為營鴛冢播風詩

隨園詩話仁和高氏與其鄰何某私通女已許配  
某家迎娶有日乃誘何外出而自懸于梁何歸見  
之大慟即以其繩自縊兩家父母惡其子女不肖  
不肯收殮邑宰唐公柘田風雅士也為捐資買棺

而雙痊之作四六判詞哀其越禮之無知取其從  
一之可憫城中紳士均為賦詩余按此題著筆褒  
貶兩難獨女弟子孫雲鶴詩最佳詞  
日云云後四句入面俱列尤為得體

擷芳集卷之五十五目錄 才媛詩

古歛訥菴汪啟淑選

汪鳳芬 四首 鮑詩 九首 張錦雲 一首

陸楚玉 一首 顧端 十首 金石堅 二首

鄭湘筠 句 薛娟 三首 梁小玉 五首

畢汾 九首 鄭翰蕇 句 楊鳳姝 十四首

邵貞 一首 潘懷燕 一首 周登望 二首

王馥 六首 宋右妍 句 林馨 四首

孫廷楨 一首

揚芳集卷之五十五

古歛訥菴汪啟淑選

汪鳳芬

字雪徵江蘇華亭縣人善丹青適休寧縣雪漁  
後齋何一裴僑居青浦縣沈港鎮著有棲枳閣  
小集

楊花聯句三十首

選四有序

困寄天涯思飛不得潛棲谷水宛客遐陬愁當  
雨夕風晨惟托酒瓢詩篋楊花落硯幾疑華彩  
縱橫舞絮凌箋却訝文瀾翻覆憑闌悵望頻傷  
駒隙飛流撫景興懷却恨鵲聲啼徹綠窻春曉  
晴開枳棘之樓紫陌烟浮寒鎖瓊瑤之案情天  
漠漠愁地茫茫擗管聯吟挑燈拈韻雖不必敲

金夏玉相共驚人亦可作  
牧唱農歌聊為噴飯云耳

天外紛紛點翠微雪晴空作雪鬪芳菲流風入座翻歌

扇杏和月當軒逐舞衣階下亂將青草色雪巖邊斜並

白雲飛川原寰海無涯際杏輕挾春光何處歸雪

繡簾宰地護輕寒雪誰把新棉隔院彈漠漠悠悠春爛

漫杏疎疎密密夜闌珊驚風亂颭鞦韆院雪著雨斜粘

芍藥欄飛唱驪歌送青帝杏子規啼徹恨漫漫雪

非關潘岳散河陽杏遊遍人間翰墨場不共蘆花衣孝

子雪豈隨梅瓣飾官粧隔簾亂舞愁容淡杏撲面斜侵

笑語香絕向東風訴恩怨雪又隨粉蝶過隣牆杏

豈是吹葭氣候灰杏只憑風信點蒼苔無邊疎影霏霏

下雪不盡長江滾滾來曾掛柔情和雨露杏又馳離緒

逐塵埃朝飛暮捲閒庭院雪別有愁容日九迴杏

鮑詩

字今暉浙江平湖縣人張鐵珊之配也著有鶴

舞堂小稿吾亦愛吾廬詩鈔吾過集

國朝畫徵錄鮑詩字今暉平湖人別駕怡山次  
女怡山有四女皆知書善畫能詩徽州老諸生

程立巖名之廉者善山水花草來游東湖姊妹  
從之專學花草傳白陽法也今暉筆尤長適余

族姪徵士雲錦有鶴舞堂小稿一卷在家時作  
吾亦愛吾廬詩鈔二卷乃與徵士倡和詩造句

幽秀攸縣彭湘南  
采入國朝詩選



擬曹思王植美女篇

美人住空谷灼灼顏如花胸羅錦繡文質毓芝蘭葩惠  
中而秀外嬌嬈詎足誇阿母幼相惜瑣窻護碧紗秉性  
慕幽貞素心謝紈綺羞作入時粧不解待年旨香草紉  
騷人明珠贈君子含笑謝蹇修托身慎厥始

擬陳伯玉題山水粉圖

碧雲兮滿天香風兮載塗信仙居之奧曠儼員嶠與方  
壺鶴迴翔兮峯碧魚戲躍兮波白瞻瑤臺兮層層數琪  
樹兮歷歷諒玉京兮可通冀婉妗兮相逢申之兮欸曲  
佩之兮珠玉陳雪藕兮冰桃進延年之醞醪

錢塘江觀潮歌

烟非烟雲非雲錢塘江上潮紛紜婆留當年騁霸業強  
弩曾挽三千軍怒如雷霆吼攫如龍虎鬪環環玉帶一  
痕白海門直下水忽立君不見如婦津孝女江精英聚  
處驚波撞何況鴟夷千古冤莫訴白馬靈旗舒一怒

黃梅花歌

君不見黃梅花開破寒沍開時恐被東風妒一枝低亞  
賽額黃却似美人怨遲暮金丸密綴鵲乍探蠟淚初緘  
春半吐從來此花三種分獨有磬口品不羣檀心巧樣  
冒冰雪蜜房花氣流氤氳銅瓶折供近彌好宛擬宮人

初入道鞠裳扼貌金縷衣黃昏也逗春情到憐渠清瘦  
貌還同新詩愧乏繼涪翁爛漫飽看風格異橫陳對嚼  
色相空南枝北枝本一脉巡檐先駐阮孚屐漫道奇芬  
品最尊正色還看壓紅白

于忠肅公墓

羣小謀何熾功臣死可哀擎天空赤手埋骨剩青苔石  
馬嘶風立靈旗捲雨回誰居喉舌地燕雀永無猜

雨聲

空堂夜寂灑來初點點聲聲葉上疎打亂荷盤南浦近  
滴殘蕉扇北牕虛收綸與托孤篷底對榻吟聯斷夢餘

曾記巴山同話處燭花重剪聽階除

杏花

蠟粉牆頭乍見時輕舒笑靨淡胭脂小樓影裏停遊轡  
橫笛聲中認酒旗上苑和風誇宴早江南細雨憶歸遲  
寫生最愛休承筆一燕新飛花兩枝

珠樓吟

湘簾試捲認微茫磨洗青銅待晚妝還是珠來還是月  
一湖秋水弄寒光

題荷花小景

垂柳垂楊罩鷺鷥紅荷花底水差差分明東浦橋邊見

一抹斜陽弄影時

張錦雲

詩見谷音傳響

次韻題明妃圖

苦霧愁烟是處稠青娥斷送紫臺秋  
欲思繫帛傳心事未必鴻飛落箭頭

陸楚玉

字雲濤浙江平湖縣人袁鎮室也

遊弄珠樓

輕雨輕烟蕩小舟踏青晚上弄珠樓  
柳搖隔岸揉絲軟

花落晴波濯錦流風遞寺鐘聲歷歷月隨漁棹影悠悠  
前人比擬原多事芳草萋萋鸚鵡洲

顧端

字昭華江蘇金匱縣人甘涼道顧光旭之女適  
諸生王相英著有昭華詩草

尹某昭華詩艸序婦女不宜作詩作詩不宜行  
世世儒言之稔矣予獨不以為然周南之詩十  
有一篇婦女所作居其九召南之詩十有四篇  
婦女所作居其十彼都人士出言有章胡不數  
觀廼以關雎為首葛覃卷耳次之聖女倡於上  
而遠邇興歌見於樛木螽斯桃夭芣苢汝墳遂  
有麟趾之徵鵲巢采芣草蟲采蘋皆公侯夫人  
叙陳家人之事自行露以及殷雷標梅小星江  
汜野麇諸篇聞于朝野然則風化起于閨門詩  
教成于女士斷可識已是以周公制禮首列正

風被之篔絃以爲房中之樂達于鄉黨推之邦國莫不謳吟而諷誦之蓋以風化天下而使凡有修齊治平之責者皆當于此取則也予嘗與經生發揮大旨罕見旁通惟觀察顧公相視莫逆且以愛君所著昭華詩草見示觀其四言古體實得溫柔敦厚之意而和外諸篇想是厭厭良人秩秩德音之雅所謂琴瑟在御莫不靜好也其隨時詠物無非采蘋采芣之遺詩云辰彼碩女令德來教又云景命有僕釐爾女士敢爲王郎誦之請以禮見王郎固辭予曰小雅不云乎彼君子女謂之尹吉我不見兮我心苑結今以通家世好年逾耆艾見亦何疑旣見君子綢直如髮益慰景行行止之懷竊謂詩草不可韞諸房中所宜達于邦國以裨風化亦猶行古之道也百爾君子不知德行慎勿囿于眾穉之說而爲善善女子所哂歟

幽思詩

酌彼流泉碧柳含烟鴈行斜度春色延綿掃徑鋤雲細

草平田人生幾許丹藥求仙

寒水冷光古木春香淨心如雪風動清商汎彼樓船水

淥吳閶喈喈黃鳥集于苞桑

停軫夜清野鶴吟聲天台何處雲物關情陟彼南山采

采芝英石泉無底瓢飲曲肱

雪後和外

舉目皓已潔庭樹復嬋娟娟前山月曖曖墟里烟烟月自無際與雪相新鮮烹雪沁牙齒坐月消塵緣萬物一時靜焚香如味禪山川同積素我心殊邈然回軫調玉琴此意師成連

王相英原倡寒宵廣庭寂屋角月娟娟遙山墮冷翠叢竹生淡烟冥冥羣動息澄澄夜色鮮平生耽靜趣每與清境緣茶甌澹忘寐得意寧須禪無言坐超忽此心常湛然俯仰念身世終夕心流連

雨坐

靄靄層雲起蕭蕭暮雨侵簷花燈下落芳意坐來深暗水流紅葉新涼襲素襟悠然心跡爽欲賦更沉吟

立秋

小樓傍晚散餘霞暑氣初消靜碧紗風影忽驚梧葉落夕陽乍見鴈行斜  
寒帷已覺羅衣薄置酒應添飲興賒塵慮因秋濯流水不知砧杵是誰家

菊

小院涼秋籬菊新近來虛室欲回春霏霏冷艷搖燈影脉脉幽情避俗塵靜夜隔紗嬌不語清香入座澹於人如何泛此忘憂物孤負檐前月似銀

寄題望園白牡丹次韻

和烟和露雪披香姚魏參差遜晚芳最是月明人靜後半開雲幙舞霓裳

葡萄浸碧露光圓疑是瑤臺月下仙別有異香攜滿袖不教紅粉點清妍

烟籠淡月月籠紗此是人間一品花  
花開一朶李泌生平最瀟灑白衣宰相本山家

金石堅

浙江湖州人所適未詳

輓貞女汪桂芳

徵詩一紙到茗川繡閣欽君孝且賢讀罷哀詞腸欲斷

淒風寒雨泣啼鵑

遙憶鴛湖汪淑姑從容就義世間無我儕不幸為巾幗

羨爾居然烈丈夫

鄭湘筠

安徽歙縣人洪曇蕊之姪女也

卧梅書舫聯句

梅影猶龍畫舫開

曇蕊

書香屬我女嬰孩

湘筠

清琴弄

月浮雲淨

曇蕊

好鳥啼花午夢回

湘筠

登眺不知身欲

去

曇蕊

悄行祇許蝶隨來

湘筠

自疑相對如圖畫

曇蕊

日日新詩共剪裁

湘筠

書舫梅開月下聯句

梅正開時月正圓

曇蕊

眼中人是畫中仙銀山有色雲

疑雪

湘筠

玉樹無塵地即天未引琴聲先落鴈

曇蕊

欲

移步影已生蓮瓊欄倚徧猶攜手

湘筠

也似嫦娥愛少年

年

曇蕊

梅花聯句

一樹寒梅倚夕陽曇蕊光浮引月月浮光裁雲尚惜雲

無色湘筠咏雪尤奇雪有香玉潤相忘紅艷曲曇蕊冰

寒欲改壽陽粧風情占斷誰為比湘筠瑩潔曇筠浴影

涼曇蕊

薛娟

字浣香江蘇荆溪縣人父琳母吳氏幼即能詩

歸郡生朱超朱素有詩名著有杏花樓唱和集

別嫂

分手河梁上茫茫感百端柳絲牽別恨花氣釀春寒話

久舟猶艤吟遲墨未乾相思如蛺蝶夢繞碧闌干

春柳

踈地長條結別情綠陰如海障層城馬嘶南陌三春暮

人倚西樓百感生流水棲鴉殘月落斷橋飛絮曉風輕

誰將羌笛相思引寫出陽關第四聲

得兄揚州手書却寄

韶光淡漚上征駢社後寒輕紫燕飛十里珠簾隋苑路

杏花如雪糝春衣

梁小玉

字玉姬號瑯環女史浙江錢塘縣人七歲即能

依韻賦落花詩八歲能摹大令帖長而游獵羣

書嘗作兩都賦著有瑯環集三卷

雜咏

松響翻虛籟泉聲浣俗塵白雲堪贈客皎月解留人

賦得落花

佳人笑立宋家東一夕驚離五柞宮紅粉飄零緣薄命  
不須惆悵妬花風

無題

的的殷紅拭未乾兒郎偷剔燭花看年來無數梨花夢  
一夜春風破悄寒

琥珀枕

仙苓千載赤脂殷雕琢移來湘簾間從此不須沾小艸  
長陪清夢白雲閒

篆章

揮灑霞箋寄隴頭雙鈴題處紫雲浮見家曾掌司花印  
總領曾城十二樓

畢汾

字晉初號素溪江蘇鎮洋縣人畢大中丞沅之  
女弟也

題三秋圖畫扇寄錢浣青

清芬容易列仙墀秋入無聲蝶未知澹白鏡中來寂寂



輭紅簾外去遲遲傾心向我非今日灑淚緣渠異昔時  
采葛三章深意在如何解作懼讒詩

輕雲淡淡日悠悠涼到銀屏思轉幽爲點彩毫能駐景  
却緣丹粉倍添愁戶肩秋影妨開鎖箔隱花光嬾上鉤  
風度廣寒香繞屋須知不是小瀛洲

亞欄掩映本相親况值秋來結淨因艷冷幾時沾薄露  
姿清何處著纖塵問天漫道炎涼異入手方知離別新  
底事西風吹不盡瑤壇閒煞散花人

並向天公乞冷香並依虛幌並迎涼清緣有分裁詩補  
別思無端倩畫償收與羅衾添夢寐散將瑤砌立風霜  
雲階月地低徊處肯信流光爾許長

題蔣夫人慧珠采芝養鶴圖

商山靈秀屬鍾山只長瓊芝不長蘭枉煞纖纖調鶴手  
折來偏認大還丹

三秀無緣種玉堂愁來何處問滄浪風光不度桐桑驛  
清俸難將鶴料償

蘭摧空谷菊猶開肯信同岑有異苔一隔洞庭天樣遠  
幾曾相識散花來

華嚴劫後晤遺容意氣心香不可蹤渺渺白雲招未得  
生涯畢竟誤癡龍

青田翠嶺倩誰探異日看停月下驂修到梅花應有分  
孤山依舊在江南

鄭翰萼

字秋羹福建晉安縣人鄭石幢太守之女也適

山陰林明府培根

句

歌罷鹿鳴更天保九如齊唱兩三章

香草齋詩話乾隆壬午年八十復膺重宴鹿鳴  
盛典諸戚友及四方郵寄各贈言金薤琳瑯盈  
箱積帙予愧不敢當而閨秀諸什亦有可傳  
者如歌罷云云鄭石幢太守女翰萼句也

楊鳳姝

字蘋香號茸城女史江蘇吳縣人楊大琛農部

之女也歸上海李太守心耕著有鴻寶樓詩鈔

楊大琛鴻寶樓詩鈔序吾鄉翁琢山詩人也集  
中有答女口號詩云左家嬌女秉夙慧把卷問  
耶欲學嗙耶窮正緣苦嗙累爾何學吟費苦心  
不聞郝鍾禮法重大義婦德何嘗在識字沈文  
愨宗伯極賞之以為正論不磨余謂識字而大  
義益明雖學嗙何累抑琢山自因已之潦倒不  
偶而感慨言之耳吾輩致窮之由政坐病癩或  
迂疎不曉世事敢盡諉諸吟癖哉癸巳五月避  
暑息園消夏適長女鳳姝從都門郵寄新詩一  
帙至讀竟爰寄語之曰相夫報國課子讀書此  
汝當盡之婦職也職盡矣以餘事學詩詩中何  
嘗無禮法在耶如必于椒花柳絮間爭一位置  
誠不免琢山  
之所訶矣  
李心耕鴻寶樓詩鈔跋余與恭人締婚襁褓十  
六歸余詩已成帙恭人家本吳中生京師歸海

上歸寧遊越既又隨余官京師出守楚南歷寶岳衡永轍迹幾半天下暇則劈箋而書之又以其餘為懷人詠古之章小閣風迴閒庭月散低徊斟酌意澹如也王寅冬將欲授梓余謂恭人日子性於詩近第詩無止境也余方宦遊名區勝蹟供點筆者何限而牢籠漱滌視乎其亦進而益工乎恭人笑而頷之

秦錫揆鴻寶樓詩鈔題詞太湖汪洋三萬六千頃支硎靈巖諸峯環繞爭雄奇其中文士慧而秀誰知女士才藻下筆蟠蛟螭恭人詩法來有自古香著作人爭師况乃彩筆本天授雄詞麗句續紛絡繹羅瓊瑰新詩一編見恨晚摩挲百過窮探窺千秋俯仰多成敗萬里山川開眼界啟卷若教掩姓名疑是天祿奇才乘酣騁雄怪我乘扁舟訪洞庭逍遙坐對君山青恭人賢聲達上下郝鍾禮法垂模型豈知更有耽吟癖玉硯松烟常自適燕寢香凝錦瑟橫翠屏花放紗牕碧夕陽鸞袖倚闌干搜句如求雙白璧編成字字爭星芒椒花柳絮今擅場豈惟一時紙貴

徧衡陽更令吳中山水生輝光

鳴鳥行

文德遠被威鳳來翔昔巢阿閣今憩高崗解一百鳥咸寂

一鳴歸昌遨遊天際誰與頡頏解二維樹有梧植山之陽

維竹有實生河之梁解三願爾周觀乎大皇戢翼乎明堂

德輝下覽昭嘉祥燦然華國以文章解四休哉泰運邁虞

軼唐和氣所感帝篤之慶解五來傳帝命其聲鏘鏘祝我

聖祚萬億年長解六

月夜

蛩吟攪殘夢靜室生虛白開牕一長望皓魄光盈席懷

人屬良夜獨坐泛瑤瑟銀潢淡無痕花影透牕隙雲際  
落清音征鴻度空碧

代簡寄二妹并懷兩大人

聚久且相憶矧我同懷人經年不得晤使我愁思盈君  
不見碧桃花傍芙蓉渡春風吹入秦川去本是同枝離  
樹飛東西南北渺何處憶昔承歡日下來團圓夜讌幾  
回開隨肩聯袂兩情厚同胞不愧閨中友古槐清影落  
屏風鬪茗敲棋佳興同日麗北堂花影亂月移南苑露  
華濃拈針度繡迷清漏剪燭分題待曉鐘雨散星離中  
道隔夢魂常繞碧雲峯昔如待哺雛棲息共巢中今如

辭幕燕分飛各西東鴻泥印爪時驚異人生聚散如萍  
寄我歸海上君吳中長使親心兩地繫曉來殘夢到膠  
關薄暮離愁托江際祇留弱妹伴慈幃瞬息他年又異  
地澣裳時擬賦歸寧高堂無奈虛中饋春寒秋燠費周  
章調護兼之兒女累一迴延望一逡巡往來恨乏雙飛  
翅去歲乘春鏡水遊古杭山色最清幽晨昏得遂瞻依  
願手足兼消契闊愁榴花開後芙蓉放十里炎雲催晝  
舫離緒纒舒旋別離美人天末空懷望闌陵佳醞武源  
桃介壽寧辭歸路遙漫擬清秋浮畫槩轉緣微疾滯蘭  
橈玉梅夾道環元墓東風爲我會留住明年春日賦歸

來輕帆早拂吳門樹

西子曲

吳王愚句踐拙兩國之命懸一妾憶昔夫差痛父讐吳  
中直奮金門戟當時衆志尚成城旌麾到處皆驚辟夫  
椒一戰越爲俘焚器燔妻亦何益剩有孤臣種與蠡此  
弱彼強計偏譎女貶姓兮男作奴孤注不教輕一擲浣  
紗有女顏如花千金購得歸鸞掖下臣稽首前致詞君  
王一見生憐惜特築新宮號館娃朝共歡遊夜專夕雀  
屏花擁燭搖紅薇帳香濃月籠白金壺漏盡紵歌殘笙  
簫猶滿芙蓉席詎知烏喙怨方深卧薪嘗膽心如鐵巨

魚縱壑奮朱髻鷺鳥離條振霜翮會稽山下戰鼓來姑  
蘇臺下舞衣歇十年生聚計近迂哀哉吳王真沒沒爲  
虺弗摧將若何猶逞雄心藐強越黃池歸馬未停嘶六  
千君子臨城闕瞑目空慙死者知甬東直與江東埒誰  
令牽羊肉袒人轉爲秉鉞揮旄客可憐甲士五千餘不  
及當時一女謁女謁熾國乃滅東門抉目臣志竭胥濤  
空捲千堆雪嗚呼愚者真愚拙非拙兩國之命懸一妾  
而夜昌兒誦孟子詩以勗之

八夜細雨如絲懸擁衣據案品玉泉吟肩雙聳夜不眠  
稚子侍坐溫芸編諄諄訓囑學古賢式穀願爾一經傳

典策具在貴精研性拙端藉勵志堅古來亞聖起一塵  
千秋絕業獨仔肩知言養氣著真詮守先待後道脈延  
齊梁歷聘豈偶然要使聖道常昭宣狂瀾砥柱千萬年  
功媿神禹孰後先遺示來學在茲篇至今鄒魯陳嘉籙  
汝曹志氣凌雲烟持已毋忘墜冰淵學古祇欲性分全  
誦讀無爲逞詞妍平地一簣志獨專美哉始基盍勉旃  
芝蘭並處茅化荃深愧賢母能三遷五經腹笥早便便  
此身應置青雲邊小牕雨過景色鮮書聲琳瑯月正圓  
拜范墳

路轉峯回處高祠景物幽終身期後樂萬笏正難酬春  
雨巖烟碧秋風墓草愁應多神鬼護千古鬱松楸

晚坐偶吟

小閣纔停繡閒庭暮色蒼竹延三徑月荷散一池香翠  
袖經秋薄金風入夜涼洞簫何處奏逸響度橫塘

奉懷兩大人代簡寄杭

違侍庭幃又閱年武陵衣帶隔雲天人生自古多離恨  
湖上於今結舊緣賸有新詩傳去雁慚無幻術學飛仙  
遙知此夜西冷月半畝塘中滿白蓮

寂寂空階月到遲白雲深處寄遙思祇因畫閣瞻依切  
倍識高堂憶念時紅藕綠藤湖上景吳山越水夢中詩

擬將桂苑飄香後一棹歸來奉玉卮

楊大琛次韻寄答詩鏡水蘭橈又一年清詩似雪寄炎天遊餘未減湖山與繡罷翻添筆墨緣為戀庭幃縈夢寐得依笑語即神仙相期重泛秋江棹采遍芙蓉勝采蓮伏雨闌風暑去遲新涼雲樹倍關思憐渠繡閣懷親夜是我書寮憶女時料理病身勤服散拚擋家務少耽詩歸來應喜椿萱健楓葉園林酒一卮

### 遊金山步外元韻

空江極目色驚秋吳楚烟雲一望收龍氣騰疑拔嶺逝  
濤聲怒欲捲山流青嵐屏立孤帆遠激浪中分片石浮  
身到蓬瀛第幾閣詩成逸興渺滄洲

硯畚李心耕元韻蛟螭環鎖暮江秋百萬奇峯眼底收破碧片帆飛白下點青拳石鎮中流濤翻龍

窟聲疑撼浪捲山根勢欲浮倒影梵宮落魚背何須海外更瀛洲

### 渡江

一天秋似水萬里碧無雲此夜乘舟去濤聲枕上聞

### 月夜舟行

遙看蟾影漾空虛一片青山畫不如柳陌菱塘人寂寂  
數聲欸乃卸帆初

### 咏園杏

園柳陰垂弄夕妍小樓聽雨句爭傳數枝紅罨青林外  
畫出江南二月天

### 憶外

漫捲湘簾放月來小牕停繡獨徘徊知君千里遙相憶  
故遣燈花夜夜開

邵貞

浙江湖州人詩見二如居詩集

題二如居詩集

詩才懷道蘊史筆憶班昭望古空文藻風流今已遙聞  
道龍江有女士雲水娟娟隔千里郵筒示我瓊瑤篇一  
日三復不能已想見金堂繡幄中古香不斷轉春風墨  
研仙掌三更露琴弄龍門百尺桐奇思雕華故無匹閨  
幃興寄滄洲逸裁紅暈碧徒紛紛對此才情各自失豈

但風雲月露形詩中有史見儀型唱酬未必慚鴻案詩  
禮無難效鯉庭側身南望思名媛碧色黏天春草遠於  
今自有女相如從遊已覺十年晚我耽佳句不遑閒舊  
稿經年手自刪生涯甘逐蠹魚盡詩卷欲留天地間三  
十春光都一瞬猶恨我斯未能信君方樹幟登詞塲敢  
以偏師臨筆陣爲拈斑管寫新篇書格簪花誰與傳肯  
以嚴詩編杜集何辭迢遞寄魚箋

潘懷燕

詩見谷音傳響

次韻題明妃圖



幽憤還和別淚稠琵琶絃斷斷腸秋生來薄命多遭劫  
一畫終身困隴頭

### 周登望

字從之浙江錢塘縣人周徵君京之女適諸生

翁初在著有天香樓外樓吟草

小粉場雜識春日穆門周徵君京與季女從之  
奔從之連負三局復以象戲決勝其長孫女桐  
君方十齡在旁徵君戲謂曰汝能此不對曰女  
固未能第不解前則愈着愈多今又愈着愈少  
也徵君曰此晉人清言不意於髫髻得之乃大  
笑後從之適翁初在早歿所著天香樓外樓吟  
草散佚  
不傳

### 早春晨起

料峭寒生破曉時已看旭影漸遲遲東風今日初傳信  
開得梅花第一枝

### 湖庄晚春

雨後鶯簧取次調一行垂柳碧迢迢好憑睨睨留春住  
未忍桃花着地飄

### 王馥

字少昭江蘇太倉州人適同邑胡栩然家貧栩栩  
然遠館無子熒熒空閨以詩自遣著有伴日草

### 寒夜思親

狂風捲雲盡新月照殘雪痛哉父與母音容一年別寂

寂空堂上肝腸幾回裂夜臺不能知淚下成冰結

感懷

自小承慈訓俄驚二十春聊能知大義故不厭清貧客  
憶青衫壻衰憂白髮親少君與德耀并曰亦高人

梅花

一枝香似雪冷淡報春知莫道無顏色江南獨占時  
冰肌與玉骨不共俗人知傲氣天然在看宜明月時

懷程氏姑

憶昔樓頭看月明夜涼人靜話離情不知何日能相見  
日斷黃山鴈一聲

雨夜

作客他鄉五月餘一枝樓上獨閑居終宵風雨心還碎  
抱女懷中望遠書

宋右妍

浙江仁和縣人適徐金粟

句

殘溜積來頻洗硯爐灰撥去屢添香

隨園詩話吾鄉宋笠田明府女名右研能詩有句  
云云嫁壻徐金粟亦少年能詩七夕云一灣河漢  
影萬里女兒情晚坐云風帶殘  
雲歸遠岫樹搖餘滴亂斜陽

林馨

字靜傑江蘇儀徵縣人優貢生照之女適江都  
 增貢生孫瑜幼從父兄學詩然性好奇俠每讀  
 昔人慷慨悲歌之作幾欲泪下及于歸後自以  
 筆墨非閨閣本分遂悉焚舊稿謝去筆墨故流  
 傳甚少耳

汪棣晤孫冠存述其母孫孺人詩因贈四絕句  
 詩婚友空過畫閣東甫傳逸藻蕙蘭叢草書卽  
 可烏絲楷悵不當時索婦翁姑八十兮兒二十  
 尊卑之際匪伶行人間風月咸堪咏却有清才  
 自謝庭門戶終難似舊時幽窻那得不憂思斂  
 藏几研開成句娣姒年深尙未知何限清芬出  
 繡闈悲歌慷慨櫛巾稀料因史  
 孰經貞處誦到沉酣意興飛

晚晴

晴光開薄暮草色綠芊綿雨歇涼侵枕天空月破烟晚  
 花嬌宿蝶老樹咽新蟬寂寞荆門閉詩成一惘然

呈唐三無先生

襟期恬淡笑春風道念堅持萬慮空璞玉何因藏匱內  
 芝蘭原自愛山中經綸小試三邊策吐納終成七返功  
 聞說詩篇驚四海知名却只在雕蟲

病中示喬兒

浮生漫擬老柴關期望須知豈等閒如此襟懷情少慰  
 絕無根脚命多慳更誰任重能分力見爾愁容亦解顏  
 得失古今休可否行雲流水自迴還

卷五十五  
三

菜花  
桃花零落菜花香曾有微名說味長可惜如金顏色好  
一生榮落總尋常

孫廷楨

字綉墨浙江仁和縣人

寶石山莊送簡齋夫子還山

才得謁高賢愁逢餞別筵山光環几翠花影拂釵妍絳  
帳明朝遠驪歌此夕編媿儂無彩筆也共試吟箋

